

蜀鑑序

蜀在禹貢一梁州爾文王興於岐西而從
武王牧野之師者乃庸蜀羗髳微盧彭濮
人說者謂文王化行江漢之所被信矣三
代以來秦得蜀以拜諸侯漢高由蜀漢以
定三秦諸葛孔明三分天下僅有其一而
伸大義於季漢非以其地西接崤函南連
荆吳扼關河之勝則為右府之固合吳蜀
之長則據上流之重險要雖控於一隅而
形勝實關於天下歟

中興南渡首吳尾蜀有常山之勢前褒後
劔得金城之險乃眷西顧護蜀如頭目保
蜀如元氣世歷百年歲經三卯外有虎噬
之虞內懷積勞之憂而蜀之為蜀非全盛
時比矣文子久仕於蜀身履目擊而動心
焉燕居深念紬繹前聞因俾資中郭允蹈
緝為一編起自秦取南鄭迄于

王師平孟昶凡地形之阨塞山川之險阻
邇雍而隣荆者稽之舊史按之圖志悉紀
于篇西南夷為蜀後戶未形之憂雖忽而

已事之鑒可師則又條其本末而附之間
又論其得失之要者定為十卷凡千三百
年蜀事之大凡亦可以概見于此噫蜀在
宇內九之一爾得之則安失之則危竊之
則亡覽是書者可以鑒焉因名曰蜀鑑云
端平三年十月朔旦昭武李文子序

蜀鑑卷第一



秦人取南鄭

秦厲公二十六年秦左庶長城南鄭

秦躁公二年南鄭反



秦惠公十三年秦伐蜀取南鄭

南鄭本古褒國按酈道元水經注云東

周之初鄭桓公死於犬戎其民南奔居

此因曰南鄭後為蜀所併至是秦始取

之

論曰常璩謂蜀以褒斜為前門則南鄭

者蜀之扞蔽也南鄭既入秦七十二年而蜀遂亡唇亡齒寒也久矣後之經理蜀者可不鑒乎

秦人取蜀

秦惠文王初更九年司馬錯伐蜀滅之常璩華陽國志曰蜀王封弟葭萌號苴侯命其邑曰葭萌苴侯與巴王為好巴與蜀讎故蜀王怒伐苴侯苴侯奔巴求救於秦惠王方欲謀楚群臣議曰夫蜀西僻之國戎翟為鄰不如伐楚司馬錯

曰蜀國富饒得其布帛金銀足給軍用水通于楚有巴之勁卒浮大船舶以東向楚楚地可得得蜀則得楚楚亡則天下併矣秋秦張儀司馬錯從石牛道伐蜀蜀王自於葭萌拒之敗績開明氏遂亡凡王蜀十二世司馬錯等因取苴與巴焉又戰國策曰司馬錯欲伐蜀張儀曰不如伐韓王曰請聞其說對曰今失蜀西僻之國而戎狄之長也弊兵勞衆不足以成名得其地不足以為利爭名

者於朝爭利者於市三川周室天下之
市朝也而顧爭於戎狄去王業遠矣錯
曰不然富國者務廣其地強兵者務富
其民以秦攻蜀譬以狼逐羊也取其地
足以廣國得其財足以富民繕兵不傷
衆而彼已服矣故拔一國而天下不以
為暴利盡西海諸侯不以為貪是我一
舉而名實兩附也今攻韓劫天子惡名
也而未必利也不如伐蜀之完也惠王
曰善起兵伐蜀取之蜀既屬秦益強富

輕諸侯○葭萌在今利州石牛即今大
安軍金牛鎮

秦惠文王十一年封子通國為蜀侯以陳
壯為相置巴郡以張若為蜀國守移秦民
萬家實之

秦惠文王十四年陳壯反殺蜀侯通國秦
遣甘茂張儀司馬錯復伐蜀誅陳壯

秦武王元年封子恽為蜀侯
秦昭襄王六年蜀侯恽反司馬錯定蜀封
子綰為蜀王

秦昭襄王二十二年王誅蜀侯綰但置蜀
守張若取筰及江南地

論曰秦人取蜀以王其親子弟三而率
皆殺之歷三十二年而始定其取之不
亦難乎初置守張若而定黔中繼用李
冰而始平水害蜀自是安寧而漢高帝
用之以取三秦其所係不亦重乎

秦人取漢中

秦惠文王十三年秦庶長章攻楚漢中取
地六百里分巴蜀置漢中郡

秦孝公初楚自漢中南有巴黔之地孝
公招戰士明功賞國以富強至是惠文
王既取蜀遂乘勝取楚地六百里又分
巴蜀置漢中焉

論曰按南鄭自南鄭漢中自漢中南鄭
乃古褒國秦未得蜀以前先取之漢中
乃今金洋均房等州六百里是也秦既
得漢中乃分南鄭以隸之而置郡焉南
鄭與漢中為一自此始春秋楚人秦人
巴人滅庸即今金房兩州地西漢地理

志漢中郡治西地今金州上庸郡是也
漢中乃秦楚巴蜀必爭之地秦得之而
全據上流以謀楚矣

昭襄王十三年任鄙為漢中守
昭襄王二十年王之漢中

秦人自蜀伐楚

昭襄王二十七年司馬錯發隴西因蜀伐
楚黔中拔之

昭襄王三十年蜀守張若伐楚取巫郡及
黔南為黔中郡

華陽國志云錯率巴蜀衆十萬大船舡
萬艘米六百萬斛浮江伐楚。巫郡在
今巫山縣及施州黔中郡即今涪黔鼎
澧諸郡皆黔中地

論曰秦併六國自得蜀始蓋與秦為怨
者楚也秦既取蜀取漢中又取黔中則
斷楚人之右臂而楚之勢孤矣劫質懷
王操縱予奪無不如意於是滅六雄而
并天下豈偶然哉由得蜀故也

漢高帝由蜀漢定三秦

漢元年春正月沛公為漢王王巴蜀漢中
都南鄭

秦始皇分天下為三十六郡巴蜀漢中
居其三割南鄭以隸漢中漢因建都於
此○漢王欲攻項羽蕭何諫曰雖王漢
中之惡不猶愈於死乎語曰天漢其稱
甚美臣願大王王漢中養其民以致賢
人收用巴蜀還定三秦天下可圖也
漢王令張良厚遺項伯使盡請漢中地項
王許之

漢王從杜南入蝕中張良送至褒中良說
漢王燒絕棧道

杜南在今京兆府萬年縣古杜伯國也
蝕中入漢中道川谷寰宇記曰褒口在
褒城縣北北口曰斜南口曰褒同為一
谷自褒谷至鳳州界一百三十里始通
斜谷斜口在鳳翔府郿縣谷中褒水所
流穴山架木以行張良勸漢王燒絕棧
道以備諸侯盜兵且示項羽無東意今
地名石門

漢王至南鄭拜韓信為大將

諸將及士卒皆謳歌思東歸多道亡韓
信亦去蕭何追之信說漢王還定三秦
遂聽信計。今興元南鄭縣米倉山有
截賢嶺韓信廟或云蕭何追信於此
漢王留蕭何收巴蜀租給軍糧食秋八月
引兵從故道出襲雍章却迎戰陳倉敗走
止戰好時又敗走遂定雍地

華陽國志曰漢祖自漢中出三秦伐楚
蕭何發蜀漢米萬石而給助軍糧又曰

巴郡有寶民多居渝水左右天性勦勇
初為漢前鋒陷陣銳氣喜鬪帝善之曰
此武王伐紂之歌也令樂人習學之謂
之巴渝舞。故道在今鳳州兩當縣陳
倉在鳳翔府寶雞縣好時在鳳翔府天
興縣

論曰漢高帝留漢中未幾反其鋒以向
關中足跡雖未嘗至蜀然所漕者巴蜀
之軍糧陷陣者巴渝之勁勇由故道戰
陳倉定雍地而王業成矣孰謂由蜀出

師不可以取中原哉

公孫述盡有蜀地

漢更始元年公孫述自稱益州牧

述茂陵人王莽以為導江率正治臨邛南陽宗成等起兵徇漢中以應漢述遣使迎成等選精兵迎擊殺之併其衆假漢使者自稱益州牧○按王莽改蜀郡為導江太守為率正

更始將李寶張忠徇蜀漢述遣其弟恢擊寶忠於綿竹大破之述自立為蜀王都成都

都

光武建武元年述遣其將侯丹取南鄭

南鄭人延岑反圍南鄭更始所立漢中王嘉初擊敗之岑復反嘉兵敗走岑遂據漢中進兵武都為更始將李寶所破岑走天水述遂遣其將侯丹取南鄭嘉收散卒數萬人以李寶為相從武都南擊侯丹不利還軍河池下辯復與延岑連戰岑引北入散關至陳倉嘉追擊破之岑屯杜陵與赤眉將逢安戰大破之

漢中王嘉亦與赤眉將廖湛戰於谷口
大破之光武令鄧禹招嘉嘉因來歙請
降延岑自武關走南陽述遂有漢中地
○武都今階州天水今秦州河池今鳳
州下辯今成州散關今大散關谷口在
今鳳翔府郿縣武關今商州南陽今鄧
州

述遣其將任滿據扞關

李熊說述東拒扞關述遣滿從閬中下
江州據之○史記張儀說楚曰秦西有

巴蜀天舡下水而浮一日三百餘里不
至十日而拒扞關扞關驚則黔中巫郡
非王之有矣史記索隱以為扞關即魚
復江關唐開顏師古注與地廣記郡縣
志皆仍其說惟後漢史注扞關在今峽
州巴山縣樂史寮宇記峽州長楊縣有
古扞關城尚存即巴山縣地此為得之
扞關宴楚地史記稱楚肅王所築今巫
郡江關則乃屬巴地故張儀云拒扞關
則黔中巫郡非秦有拒抵也至右黔中

巫郡皆在楚扞關之外也蓋扞關乃楚之扞關江關乃巴蜀之江關也述據扞關則荆門虎牙在扞關之內皆其設險之地豈肯先自隘而但守魚復之江關哉故辯之以正地理之闕江州縣名今重慶府閬中今閬州

述遣其將李育程烏屯陳倉馮異迎擊大破之

述聚兵數十萬人積糧漢中遣李育程烏將數萬衆出屯陳倉徇三輔馮異擊

走之育烏俱奔漢中○陳倉在鳳翔寶

雞縣

光武得隴望蜀

建武八年來歙伐隗囂拔略陽

隗囂據隴右歙將二千餘人襲略陽斬守將金梁囂大驚曰何其神也帝聞得略陽甚喜曰略陽囂所依阻心腹已壞則制其支體易矣○略陽在今秦州隴

城縣

隗囂圍略陽公孫述遣將李育田弇助之

囂盡銳攻略陽累月不能下

夏四月帝自征隗囂至高平河西竇融來朝

高平今鎮戎軍高平寨古安定地

隗囂將妻子奪西城

西城今金州西城縣

吳漢岑彭圍西城耿弇蓋延圍上邽九月乙卯車駕還宮

帝自上邽晨夜東馳賜岑彭等書曰兩城若下便可將兵南擊蜀虜人若不知

足既平隴復望蜀每一發兵頭須為白

岑彭擁谷水灌西城城未沒丈餘會王

元等將蜀救兵五千乘高卒至鼓譟大

呼曰百萬之衆方至漢軍大驚元等決

圍死戰遂得入城迎囂歸冀城○冀城

在今秦州隴城縣上邽在今秦州

隗囂病死子純立

帝使來歙護諸將屯長安遂討隗純於天

水十月攻破之純降

歙上書曰公孫述以隴西天水為藩蔽

故得延命假息今二郡平蕩則述智計
窮矣

公孫述使王元拒河池來歙蓋延進攻大
破之遂克下辯

隗囂將王元降述述使拒河池歙與蓋
延等破之遂克下辯秉勝而進蜀人大
懼○河池今鳳州下辯今成州同谷縣
盜殺來歙

王元遣刺客殺歙歙以蓋延領其軍
岑彭吳漢由江道取蜀

建武五年岑彭自夷陵屯津鄉

田戎據夷陵岑彭攻拔之獲其衆萬餘
人戎亡入蜀述以戎為翼江王岑彭謀
伐蜀以夾川谷少水險難漕留馮駿軍
江州田鴻軍夷陵李玄軍夷道自引兵
還屯津鄉當荊州要會喻告諸蠻夷降
者奏封其君長○夷陵今峽州夷陵縣
夷道今峽州宜都縣津鄉左氏傳曰楚
子大敗於津鄉後漢志云江陵有津鄉
寰宇記云津鄉故城在今江陵縣東渚

宮即其地

建武六年公孫述使田戎出江關招其故
衆欲取荊州不克

江關漢地理志云江關都尉理魚復注
水經云白帝山北緣馮嶺接赤甲山南
北相去八十五丈東西七十丈東傍灤
溪西南臨大江瞰之眩目惟馮嶺小差
逶迤猶斬山為路羊腸教轉然後得上
公孫述據蜀自以承漢土運故號曰白
帝城寰宇記云赤甲城公孫述築不生

樹木土石悉赤如人袒臂故曰赤甲與
舊白帝城相連背在縣北即江關之要
也在今夔州奉節縣

建武九年春述遣田戎下江關據荊門虎
牙

述遣其將田戎任滿程汎將數萬人下
江關擊破馮駿等軍遂拔巫及夷道夷
陵因據荊門虎牙橫江水起浮橋關樓
立攢柱以絕水道結營跨山以塞陸路
拒漢兵○荊州記云南荊門北虎牙二

山臨江楚之西塞酈道元注水經云公孫述依二山作浮橋拒漢師下有急灘名虎牙灘郭璞江賦曰虎牙桀立以屹率荆門閉竦而盤礴淵九回以高騰溢流雷响而電激寰宇記云虎牙山有石壁其色黃間有白文亦有牙齒形夷陵志云上有城下有十二碛有灘甚惡在今峽州

建武十一年春岑彭破夷陵入江關上墊江馮駿守江州

岑彭數攻田戎等不克帝遣吳漢率劉隆等三將發荆州兵凡六萬餘人騎五千匹與彭會荆門彭裝戰船數十艘吳漢以掉率多費糧穀欲罷之彭以為蜀兵盛不可遣上書言狀帝曰大司馬不曉水戰荆門之事由公而已閏月彭募攻浮橋先登者賞於是偏將軍魯奇應募而前東風狂急奇舡逆流直衝浮橋攢柱有反杷鉤奇舡不得去奇等乘勢殊死戰因飛炬焚之風怒火盛樓橋崩

燒彭悉軍順風並進所向無前蜀兵溺死者數千人斬任滿禽程沅而田戎走保江州彭率臧言劉歆長驅入江關彭到江州以其城固糧多難卒拔留馮駿守之自引兵乘利直指墊江攻破平曲收其米數十萬石吳漢留夷陵裝露橈繼進○墊江即今合州平曲未詳然彭既指墊江從涪水上平曲則在今遂寧潼川之境也

述使其將延岑呂鮪王元公孫恢拒廣漢

及資中又遣侯丹拒黃石

漢立廣漢郡資中今資州資陽縣乃中水經歷之地寰宇記云黃石在今涪州涪陵縣有橫石灘岑彭已上墊江則述拒廣漢以備涪水屯資中以備江陽只先遣侯丹率二萬人以拒黃石則述拒於江州之先也

岑彭自墊江還江州沂都江襲擊侯丹大破之便臧宮拒延岑於涪水大破之彭遂進拔武陽

彭使臧宮將降卒五萬從涪水上平曲
拒延岑自分兵孚江下還江州沂都江
而上襲擊侯丹大破之因晨夜倍道兼
行二千餘里徑拔武陽使精騎馳擊廣
都去成都數十里勢若風雨所至皆奔
散初述聞漢兵在平曲故遣大兵逆之
及彭至武陽繞出延岑軍後蜀地震駭
述大驚以杖擊地曰是何神也延岑盛
兵於沅水臧宮以轉輸不繼降者欲散
畔會帝遣謁者將兵詣岑彭有馬七百

匹宮矯制取以自益晨夜進兵多張旗
幟登山鼓譟右步左騎挾船而引呼聲
動山谷岑大震恐因縱擊大破之斬首
溺死者萬餘人延岑奔成都其衆悉降
自是降者以十萬數王元舉衆降○後
漢志沅水當為沈水注水經云沈水自
廣漢郡入涪江今按中江縣有一水入
涪臧宮旋平綿竹必自今中江水也
論曰延岑自廣漢入涪水以拒墊江今
州而岑彭下墊江由江州復上都江拔

武陽

武陽今彭山縣由今合州

此蜀人

所以為神也史謂自都江倍道兼行二

千里至武陽蓋夸詞之誤矣

冬十月盜殺岑彭于武陽十有二月吳漢

將三萬人泝江而上

述使刺客詐為亡奴降岑彭刺殺彭監

軍鄭興領其營以候吳漢至而授之

建武十二年春正月吳漢進拔廣都

吳漢破述餘黨於武陽帝詔漢直取廣

都據其心腹漢乃進軍攻廣都拔之

秋七月馬駁拔江州獲田戎滅宮拔綿竹

破涪城斬公孫恢

吳漢入成都述自殺誅延岑

論曰光武得隴望蜀其勢若易矣而功

反難岑彭泝流討蜀其勢若難矣而功

反易何耶以下辯河池皆武都之阨塞

述能守之誠未易窺而瞿唐為蜀之天

險述不之守而遠恃荆門虎牙以為固

浮橋一燎而述之拔窮矣然光武中興

復漢舊物述猶陸梁一隅斗絕之蜀此

其見與井蛙何異身死族滅非不幸也

蜀鑑卷第一

蜀鑑卷第二

曹操平張魯取漢中

漢獻帝初平二年益州牧劉焉遣張魯襲漢中

劉焉在益州陰圖異計沛人張魯自祖父陵以來為五斗米道居于蜀焉乃以魯為督義司馬掩殺漢中太守蘇固斷絕斜谷閣殺害漢使建安五年劉璋襲父焉位魯以璋闇懦不復承順襲別部司馬張脩殺之而併其衆魯遂據漢中

與璋為敵

建安二十年曹操擊張魯自武都入氏氏人塞道遣張郃朱靈攻破之

武都今階州同谷武興等地舊有白馬

氏據之

操自陳倉出散關至河池屠氏王實茂衆萬餘人

秋七月操至陽平魯遣其為衛等據陽平關操遣將夜襲破之魯潰奔巴中操遂入南鄭

軍自武都山行十里升降險阻操於是

大饗軍士七月至陽平魯使弟衛與將

楊昂等據陽平關橫山築城十餘里攻

之操乘險夜襲大破之魯潰奔巴中操入

南鄭盡得府庫珍寶○陽平後漢史注

周地圖記云褒谷西北有古陽平關其

地在今梁州褒城縣西北也又按寰宇

記褒城縣有漢陽關在縣西北漢時所

立也先主破夏侯淵於其地水經注又

云白馬城亦名灑口有陽平關在今西

縣西縣乃古沔陽去褒城縣七十里邑名遷徙未可知也郡縣志因謂曹操昭烈孔明皆嘗至關下來嘗越關則誤矣今大安軍五里亦有陽平關頗險要然非舊迹也

十二月操留夏侯淵張郃守漢中

操之留淵郃也以雞肋示外人外人莫察主簿楊脩獨曰夫雞肋棄之如可惜食之無所得也

論曰曹操芟夷群雄偽定一時再入漢中而不能下殆強弩之末非真不可向也抑天留以遺昭烈孔明使萬世之三綱賴以不泯耶

昭烈君臣由江道入蜀

建安十六年昭烈自荊州將數萬人入蜀至江州北由墊江水詣涪

昭烈帝在荊州三顧諸葛亮於草廬問以計策亮曰荊州北據漢沔利盡南海東連吳會西通巴蜀此用武之國而其主不能守此殆天所以資將軍將軍豈

有意乎益州險塞沃野千里天府之土
高祖因之以成帝業劉璋暗弱張魯在
北民殷國富而不知存卹智能之士思
得明君將軍既帝室之胄信義著於四
海揔攬英雄思賢如渴若跨有利益保
其巖阻西和諸戎南撫夷越天下有變
則命一上將將荊州之軍以向宛洛將
軍身率益州之衆出於秦川百姓孰敢
不箠食壺漿以迎將軍者乎誠如是則
霸業可興王室可成矣昭烈既破曹操

張松說璋遣法正迎昭烈于荊州法正
陰勸昭烈取益州昭烈疑未決龐統復
贊之昭烈乃留諸葛亮守荊州以趙雲
領留營司馬昭烈將步卒數萬人入益
州自江州北由墊江水詣涪去成都三
百六十里璋率步騎三萬人往會之歡
飲百餘日○按昭烈自今重慶府入合
州江路下水至涪即今綿州唐乾符間
王助綿州富樂山碑云昭烈入蜀劉璋
延之此山望見蜀之富盛飲酒樂甚故

得名

璋推昭烈為大司馬使擊張魯昭烈至葭萌

璋增昭烈兵厚加資給使擊張魯又令

督白水軍璋還成都昭烈北到葭萌未

即討魯○白水軍按後漢史注公孫述

將侯丹開白水關城西南有白水關葭

萌在今利州

昭烈自葭萌襲蜀進據涪城

劉璋斬張松昭烈大怒召白水軍督楊

懷高沛貴以無禮斬之勒兵徑至關頭

并其兵遂進據涪城○涪城今綿州

建安十八年昭烈圍雒城

雒城今雒縣

建安十九年諸葛亮留關羽守荊州遂與

張飛趙雲沂流克巴東至江州破巴郡太

守嚴顏生獲之分遣趙雲從外水定江陽

捷為飛定巴西德陽

法正與劉璋書曰今張益德教萬之衆

已定巴東入捷為界分平資中德陽三

道並進將何以禦之又魚復與閬顯實
為益州禍福之門今二門悉開數道並
進已入心腹愚以為可圖變化以保尊
門○秦滅巴置巴郡治江州江州縣名
今重慶府巴縣是也劉焉分巴為二墊
江以上為巴西治安漢今果州墊江以
下為巴東治江州墊江今合州是也江
陽今瀘州犍為今資榮嘉眉等地德陽
今遂寧府趙雲自外水至瀘州分定資
中嘉眉等地張飛自重慶入合州定遂
寧果州等地耳又法正稱益德入犍為
界分平資中德陽此正在雒城與璋書
非能遙度於千里之外者飛自墊江上
未嘗入犍為資中也

昭烈進圖成都劉璋出降

雒城潰進圖成都諸葛亮張飛趙雲引
兵來曹馬超自武都密書請降昭烈令
引軍屯城北城中震怖圍城數十日璋
遂出降

吳蜀分荊州

建安二十年關羽屯江陵吳孫權遣諸葛瑾求荊州諸郡昭烈不許呂蒙取長沙桂陽兩郡零陵太守郝普固守

權令諸葛瑾從備求荊州諸郡昭烈不許曰吾方圖涼州涼州定乃盡以荊州相與耳權曰此假而不反欲以虛辭引歲者也遂置長沙零陵桂陽三郡長吏關羽盡逐之權遣呂蒙督兵二萬以取三郡長沙桂陽皆望風歸服惟零陵太守郝普城守不降○長沙在今潭州零陵在今永州桂陽在今郴州

昭烈至公安遣關羽至盜陽爭三郡吳孫權進住陸口魯肅屯益陽以拒羽郝普以零陵降呂蒙

權遣書召呂蒙舍零陵急還助魯肅蒙得書秘之夜召諸將授以方略晨當攻零陵遣客語郝普以昭烈在漢中關羽在南郡無外援可恃普懼出降蒙即日引軍赴益陽○公安在今江陵府陸口在今鄂州蒲圻縣寰宇記有孫權城益

陽在今潭州益陽縣寰宇記云有魯肅城常德府沅江縣有關羽屯兵之處名曰關州沅江亦益陽縣境魯肅關羽會語於此

昭烈求和於吳遂分荊州以湘水為界長沙江夏桂陽以東屬吳南郡零陵武陵以西屬漢

昭烈聞曹操攻漢中遣使通好於權遂中分荊州○江夏在今鄂州南郡今江陵府武陵今常德府

論曰荊州首吳尾蜀據腹心之會合二長以向中原可也跨有荊益保其巖阻次也若中分而與吳共之則吳可以攻而蜀不可以守公孫述之困於夷陵是也惜哉昭烈君臣奮興之晚而三分天下僅有區區之一隅也

昭烈取漢中

建安二十一年張飛大破張郃軍於岩渠曹操既定漢中留夏侯淵張郃守之黃權言於昭烈曰若失漢中則三巴不振

此為割蜀之股臂也操使張郃督諸軍
徇三巴欲徙其民於漢中進軍岩渠巴
西太守張飛與郃相拒五十餘日飛襲
擊郃大破之郃走還南鄭

建安二十二年昭烈率諸將進兵漢中遣
張飛馬超吳蘭等屯下辨曹操遣曹洪拒
之

法正說昭烈曰曹操一舉而降張魯定
漢中不因此以圖巴蜀必有內憂故耳
今舉衆取漢中必可克之克之之日廣

農積穀觀釁伺隙上可以傾覆寇敵中
可以廣拓境土下可以固守要害此不
可失也昭烈從之○下辨今成州同谷
縣

建安二十三年魏曹洪及吳蘭戰于固山
蘭敗死之

洪將擊吳蘭張飛屯固山聲言欲斷軍
後衆議狐疑曹休曰賊實斷道者當伏
兵潛行今乃先張聲勢此其不能明矣
宜衆乘其未集促擊蘭蘭破飛自走矣洪

從之進擊破蘭殺之張飛馬超走。固
山木詳

昭烈屯陽平關

夏侯淵張郃徐晃等與之相拒昭烈遣
陳式等絕馬鳴閣道徐晃擊破之張郃
屯廣石昭烈攻之不能克急書發益用
兵諸葛亮以問楊洪洪曰漢中益州咽
喉存亡之機會若無漢中則無蜀矣此
家門之禍也男子當戰女子當運發兵
何疑。○馬鳴閣寰宇記曰在今利州昭
化縣按蜀志曹操曰此關乃過漢之平
陰咽喉之要路恐非昭化也廣石陽平
關西有礦石關

建安二十四年昭烈自陽平破夏侯淵軍
於定軍山斬淵首

昭烈與夏侯淵相拒踰年昭烈自陽平
南渡沔水緣山梢前營於定軍與勢淵
引兵爭之法正曰可擊矣遂使黃忠乘
高鼓譟攻斬淵及趙顯張郃引軍還陽
平明日昭烈欲渡漢水攻郃諸將以衆

寡不敵依水為陳以拒之郭淮謂卻曰
不如遠水為陳引而致之半濟而後擊
之可破也既陳昭烈疑不渡淮遂固守
○定軍山在今興元府西縣興勢在今
洋州興道縣有興勢山
三月曹操自長安出斜谷至漢中趙雲破
其軍於漢水

操自長安出斜谷軍處要以臨漢中昭
烈曰曹操雖來無能為也我必有漢川
矣乃歛衆拒險終不交鋒操運米北山

下黃忠引兵欲取之過期不還趙雲將
數十騎出營視之值操揚兵大出雲猝
與相遇遂前突其陳且鬪且却魏兵散
而復合追至營下雲入營更大開門偃
旗息鼓魏兵疑雲有伏引兵還雲雷鼓
震天惟以勁弩於後射魏兵魏兵驚駭
墮漢水中死者甚多明旦昭烈自來至
雲營視昨戰處曰子龍一身都為膽也
○處要興元記云曹操城在縣西北十
七里斜谷口處要置軍處

夏五月操與漢中諸軍還長安

操後嘗語人曰南鄭直為天獄中斜谷道為五百里石穴耳

昭烈遣孟達從梯歸北攻房陵下之遣劉封乘沔水與達會攻上庸太守申耽舉郡降

以耽為上庸太守耽弟儀為西城太守

定漢中地○秭歸今歸州房陵今房州

上庸西城皆今金州地即漢地理志漢

中諸郡也

秋七月昭烈即漢中王位於沔陽以魏延領漢中太守

沔陽今興元府西縣

關羽失荊州

建安二十四年關羽自江陵攻樊大破于

禁龐惠於漢中

關羽使糜芳守江陵傅士仁守公安自

率眾攻曹仁於樊仁使于禁龐惠等屯

樊北八月大霖雨漢水溢平地數丈于

禁等七軍皆沒禁等登高避水羽乘大

舡就攻之于禁遂降殺龐真○樊城在今襄陽府

羽圍樊城

羽急攻樊城城得水往往崩壞衆皆洶懼滿寵謂曹仁曰今若遁去洪河以南非復國家有也乃沈白馬為盟同心固守羽乘船臨城立圍數重外內斷絕羽又遣別將圍呂常於襄陽荊州刺史胡脩南陽太守傅方皆降於羽羽威震華夏操議徙都以避其銳

呂蒙襲江陵取之關羽退走死於章鄉孫權遂定荊州

呂蒙屯陸口勸孫權取利全據長江蒙遂稱病篤權檄蒙至蕪湖陰與圖計遣陸遜代蒙屯陸口遜深自謙抑為盡忠自託之意於羽羽意大安稍撤兵以赴樊羽得于禁等人馬數萬糧食乏絕擅取權湘關米權聞之遂發兵襲羽以呂蒙為大督孫權上疏曹操請討羽自放羽聞之猶豫不能去會傳万胡脩皆死

羽遂撤樊城之圍。呂蒙至尋陽，羽所置江陵守糜芳、公安守傅士仁皆降。蒙入江陵，撫其將士，封府庫以候權。至羽聞南郡破，即走南還。權至江陵，荆州將吏悉皆歸附。獨治中從事潘濬稱疾不見。權輿致之，即遣濬平武陵，斬其從事樊佃。以陸遜領宜都、太守關羽西保麥城。權命朱然斷其徑路，獲羽及其子平於章鄉，斬之。遂定荆州。○陸口今鄂州蒲圻縣。蕪湖今太平州尋陽。今江州武陵。今鼎州宜都。今峽州宜都縣。麥城在沮水上。水經：沮水又逕麥城西。荆州記云：麥城東有驢城，西有磨城。伍子胥造此二城，攻麥城。俗諺云：東驢西磨。麥自破，章鄉在漳水上。水經：漳水出臨沮縣東，荆山又東，過章鄉。南荆州記云：即楚交城。古老相傳：楚昭王所築，並在今荆州軍當陽縣。

蜀失漢中三郡

蜀漢章武元年，孟達以上庸降魏。

將軍孟達屯上庸與劉封不協封侵凌之達率部曲四千餘家來降魏主丕合房陵上庸西城三郡為新城以達領新城太守委以西南之任行軍長史劉曄曰達有苟得之心而恃才好術新城與孫劉接連若有變態為國生患達與夏侯尚等共襲劉封上庸太守申耽叛封降魏封破走還成都丞相亮勸昭烈除之遂賜封死達後入城登白塞嘆曰劉封申耽據金城千里而失之手○上庸

西城今金州縣房陵今房州

昭烈攻荊州不利

章武元年昭烈自率諸軍擊孫權張飛自閬中會江州飛將張達范疆殺飛以奔孫權

章武三年昭烈至秭歸遣黃權督江北諸軍昭烈屯於夷道猓亭

猓戶交反

昭烈自秭歸將進擊吳黃權諫曰吳人悍戰而水軍沿流進易退難請為先驅以當敵昭烈不從以權為鎮北將軍自

率諸將自江南緣山截嶺軍於夷道獠亭吳將皆欲迎擊之陸遜曰蜀軍緣山行軍勢不得展自當罷於木石之間徐制其敵矣漢人自狼山通武陵使馬良以金銀賜五溪諸蛮夷授以官爵○獠亭在今峽州夷陵縣蹤跡夷滅已不可考狼山在今峽州長楊縣武陵今常德府

昭烈敗績于獠亭

漢人自巫峽建平連營至夷陵界立教

十屯以馮習為大督張南為前部督自正月與吳相拒至六月不決陸遜上疏於孫權曰夷陵要害國之閉限雖為易得亦復易失失之非徒損一郡之地荆州可憂今敵師捨船就步處處結營察其布置必無它變諸將先進攻一營不利遜曰吾已曉破之之術乃敕各持一把茅以火攻拔之通率諸軍同時俱攻斬張南馮習等首破其四十餘營昭烈升馬鞍山陳兵自統遜督從諸軍四面

蹙之死者萬數昭烈夜遁驛人自檐燒
鏡鎧斷後僅得入白帝城傳形為後殿
死之馬良亦死於五溪黃權在江北率
其衆降魏○建平在今歸州馬鞍山在
猗亭夷陵志云夷陵要害南有石鼻馬
鞍猗亭寰宇記云今歸州巴東縣有石
門山山有石迳深若重門劉主為陸遜
所破燒鎧斷道然後得免

論曰閔雲長以萬人之敵卧護荊州昭
烈君臣以為長城而輕躁寡謀隨呂蒙

之詭計昭烈勇於一決以爭荊州君臣
於是俱失之矣或謂是役也昭烈不自
將而孔明長嘯以下荊州則何如曰非
孔明之志也孔明固為孫權可與為援
而不可圖又謂國賊曹操非孫權又謂
法孝直在必能諫上此行孔明蓋亦難
之矣曰然則荊州遂可置之度外乎曰
向使雲長自江陵出襄陽而益德黃權
有一人焉為居守之計則固可震憾中
原而無後顧之憂矣雲長既死雖孔明

亦末如之何也。

巴西太守閻芝遣馬忠將五千人至永安
章武四年諸葛亮至永安昭烈崩于永安
永安今夔州奉節縣

蜀鑑卷第二

蜀鑑卷第三

漢諸葛忠武侯北伐

蜀漢建興五年丞相亮出屯漢中營沔北
陽平石馬

陽平沔之北石馬或云陽平關北有白
馬山石當作白字之誤也

建興六年丞相亮出師祁山天水南安
安定皆降

亮與群下謀之丞相司馬魏延請假精
兵五千負糧五千直從褒中出循秦嶺

而東當子午而北不過十日可到長安
公從斜口來亦足以達亮以為此危計
不如安從坦道可以平取隴右不用延
計亮楊聲由斜谷取郿使趙雲鄧芝為
疑軍據箕谷亮身率大軍攻祁山戎陣
整齊號令明肅於是天水南安安定皆
叛應亮關中響震○祁山在西和州長
道縣東寰宇記云上有城極巖回開山
圖云祁山九州之名阻天下之奇峻又
云南岬北岬萬有餘家諸葛亮表云祁

山縣去沮五百里有人萬戶沮在今沔
州天水南安今秦州地安定今涇州地
三郡即隴右也郿今鳳翔府郿縣箕谷
今鳳翔府寶雞縣子午谷王莽所通從
杜陵直絕南山徑漢中從今洋州路
魏遣將張郃拒亮馬謖與郃戰于街亭敗
績天水三郡復入于魏
亮以馬謖督諸軍在前與張郃戰于街
亭謖違亮節度舉措煩擾舍水上山不
下據城張郃絕其汲道舉大破之亮乃

拔西縣千餘家還漢中收謖下獄殺之
趙雲鄧芝亦敗於箕口天水三郡復入
于魏○街亭今秦州隴城縣有街泉亭
即馬謖所敗之地寰宇記又於南鄭載
之誤矣西縣隴西郡有西縣今興元府
有諸葛亮城樂史云亮拔隴西千餘家
築城以處之

冬丞相亮出散關圍陳倉不克師還魏將
王雙追亮亮破其師斬之

亮上言曰漢賊不兩立王業不偏安以

先帝之明固知臣伐賊才弱敵強然不
伐賊王業亦亡與其坐而待亡孰與伐
之今民窮兵疲而事不可息事不可息
則住之與行勞費正等臣鞠躬盡力死
而後已至於成敗利鈍非臣之明所能
逆睹魏使郝昭守陳倉亮不能克糧盡
引去○散關今大散關陳倉今鳳翔寶
雞縣城是也寰宇記云陳倉有二城相
連上城是秦文公築下城郝昭築
八年丞相亮攻武都陰平二郡拔之

亮遣其將陳戒攻武都陰平二郡郭淮引兵救之亮自出至建威淮退遂拔二郡以歸○曹操嘗徙武都氏五萬餘落於秦州故丞相亮得取其地建威水經注漢水文西建安川入焉導原建威西北鳳州圖經云梁泉縣有武侯城又有思計臺在城南武侯登臺籌畫因以為名華陽國志武都郡治下辨今成州一名武街有故道縣河池縣即鳳州也蓋武都乃今階成鳳州之地南鄭之喉襟

武侯所必爭也陰平今文龍等州

丞相亮從府營於南山原上築漢城於沔陽築樂城於成固

昭烈即位於沔陽故漢中治沔陽今西縣是也以沔陽為漢城成固為樂城通鑑所書據常璩華陽國志寰宇記云西縣有西樂城在山上周三里亮築以防邊當考

魏使司馬懿由西城張郃由子午曹真由斜谷來攻丞相亮次於成固赤坂

會天大雨棧道斷絕真等皆還。○西城
今金州子午在萬年縣斜谷今鳳翔府
成固在興元府

建興九年春丞相亮出軍圍祁山始以木
牛運魏司馬懿張郃救祁山夏六月師還
郃追至青封破之郃中箭死

亮分兵留攻祁山自逆司馬懿于上邽
郭淮等徼亮亮破之因大芟刈其麥與
懿遇于上邽之東懿歛軍依險兵不得
交亮引還懿等尋亮至于鹵城亮既至

又登山掘圍不肯戰賈詡魏平數請戰
因曰公畏蜀如虎柰天下笑何懿病之
乃使張郃向亮亮使魏延等逆戰魏兵
大敗漢人獲甲首三千懿還保營六月
亮以糧盡退軍懿遣張郃追之郃進至
木門與亮戰蜀人乘高布伏方弩亂發
飛矢中郃右膝而卒。○上邽鹵城皆在
今秦州青封通鑑云在水門未詳
建興十年亮休士勸農於黃沙作流馬運
黃沙寰宇記云漢水之東黃沙水注之

水側有黃沙屯亮所開也今興元府有黃沙倉

建興十一年丞相亮使諸軍運米集斜谷口治斜谷

建興十二年春丞相亮率衆十萬由斜谷伐魏夏四月至郿軍於渭水之南屯五夫原

司馬懿引軍渡渭背水為壘以拒之謂諸將曰亮若出武功依山而東誠為可憂若西上五夫原諸將無事矣亮果屯

五夫原郭淮言於懿曰亮必爭北原若跨渭登原連兵北隔絕隴道搖盪民夷非我之利也乃使淮屯北原漢兵大至淮逆擊却之亮以前者數出皆以糧運不繼使已志不伸乃分兵屯田為久駐之基耕者雜於渭濱居民之間百姓安堵軍無私焉。五夫原在武功故縣今在鳳翔府郿縣注水經云積石原在渭水北即郭淮所據北原也

八月丞相亮薨于渭南

亮數挑戰懿不敢出亮遣遺巾愷懿患
之上表請戰魏主獻使辛毗杖節為軍
師以制之亮謂其下曰彼本無戰情所
以固請戰者示武於其衆耳將在軍君
命有所不愛苟能制吾豈千里而請戰
耶相持百餘日亮疾病密授楊儀費禕
等退師節度亮薨年五十四遺令葬定
軍山不封不樹莫知所在

張宣公曰三代衰五伯起而功利之說
盈天下謀國者不復知正誼明道之為
貴三老董公獨得宏綱以告漢高帝惜
高帝未能盡其用也武侯當漢祚之季
乃能執其機而用之其言曰漢賊不兩
立臣鞠躬盡力死而後已至於成敗利
鈍非臣之明所能逆睹嗚呼此夏少康
四十年經營宗祀而卒以配天之本心
也昭烈名義既正好賢之意又篤安得
不以身許之侯恢復規模先務為根本
之計務農訓兵內治國事國事既定北
向致討軍旅將發拜表納忠尤為切至

侯之慮深且遠矣侯之規模至使耕者
雜於渭濱軍無私焉輿圖之復已在目
中不幸薨謝匪大數然歛或謂魏延之
策惜侯不用不知天將昌漢以侯舉措
掃禽亂賊直餘事耳行險僥倖非侯志
也

蜀漢蔣琬費禕保蜀

後主延熙元年大將軍蔣琬出屯漢中

丞相亮之薨至是五年

延熙五年將軍姜維自漢中還屯涪縣

延熙六年大司馬蔣琬自漢中還住涪以

王平督漢中

先是蔣琬以丞相亮數出秦川糧運之
絕迄無成功乃多作舟船欲乘漢沔東
下襲魏興上庸會舊疾連動未時得行
漢人或以為事有不捷還路甚難非長
策也後主遣費禕姜維等喻指琬乃上
言魏跨帶九州未易速得志且當分裂
蠶食摧其支黨議以涼州胡塞之要進
退有資且羗胡思漢如渴宜以維為涼

州刺史若維征行衝制河右臣當帥軍
為維後繼今涪水陸四通惟急是應若
東北有虞赴之不難請徙屯涪徙之維
遂徙屯琬自漢中還住涪疾益甚以漢
中太守王平督漢中吳步騭朱然亦上
疏於吳王曰自蜀還者咸言蜀欲背盟
與魏交通蔣琬守漢中聞司馬懿南向
不出兵乘虛以掎角之反委漢中還近
成都事已彰灼無所復疑宜為之備。
魏以西城為魏興郡在今金州上庸今

房州涪今綿州

論曰蔣琬委去南鄭稱疾屯涪無復遠
略非但不足於攻且不足於守然則所
謂乘漢沔以復漢中保涼州而後氏羗
殆虛語耳蜀之不競琬之罪也

延熙七年魏大將軍曹爽由駱谷向漢中
將軍王平拒興勢圍大將軍費禕往赴救
魏師追禕還成都

爽西至長安發卒十萬餘人與玄自駱
谷入漢中漢中守兵不滿三萬諸將皆

恐欲守城不出以待涪兵王平曰漢中
去涪垂千里賊若得關便為深禍今宜
先遣劉敏據興勢平為後拒右賊分向
黃金平率千人下自臨之比爾間涪軍
亦至此計之上也遂帥所領據興勢多
張旗幟彌亘百餘里遣大將軍費禕督
諸軍救漢中爽兵距興勢不得進涪軍
及費禕兵繼至遂引退禕進據三嶺以
截爽爽率險苦戰僅乃得過失亡甚衆
關中為之虛耗○駱谷在鳳翔府盩厔

縣西南一百二十里寰宇記云漢魏舊
道也興勢今洋州興道縣有興勢山路
谷入洋州上屈曲八十里下屈曲八十
四盤黃金戍在縣西北張魯所築水陸
艱險以黃金水得名三嶺關名在荔嶺
關南陽嶺北

延熙八年大將軍費禕至漢中行圍守
延熙九年費禕還成都大司馬蔣琬卒
延熙十年雍涼羗胡叛降漢漢姜維將兵
出隴右以應之

延熙十一年大將軍費禕出漢中

延熙十二年衛將軍姜維出攻雍州不克而還

維至雍州依麴山築二城使句安李韶等守之魏郭淮陳泰禦之泰曰麴城雖固去蜀險遠當須運糧可不血刃而拔其城也乃使泰率徐質鄧艾進兵圍麴城斷其運道及城外流水安等挑戰不許將士困窘分糧聚雪以引日月維引兵救之出自牛頭山與泰相對泰曰兵法

貴在不戰而屈人今絕牛頭維無反

道則我之禽也遣使白淮使淮趣牛頭

截其還路淮從之進軍洮水維懼遁走

安等孤絕遂降鄧艾留屯白水北維遣

其將廖化自白水南向艾結營艾謂諸

將曰維必自東襲取洮城洮城在水北

去艾屯六十里艾即夜潛軍徑到維果

來渡而艾先至據賊得以不敗漢軍遂

還

延熙十三年姜維復入西平不克

延熙十四年大司馬費禕出屯漢壽
昭烈改葭萌為漢壽

延熙十六年盜殺大司馬禕于漢壽
姜維出師隴右

延熙十六年姜維出師圍狄道

姜維自以練西方風俗兼負其才武欲
誘羗胡以為羽翼謂自隴以西可斷而
有每欲興軍大舉費禕常裁制不從及
禕死維得行其志乃將數萬人圍狄道
司馬師使郭淮陳泰拒之維糧盡退還

○陳壽蜀書云維圍南安狄道今熙渭
州南安今鞏州

延熙十七年姜維出師隴西拔狄道河間
臨洮三縣民居于綿竹繁縣

狄道長李簡密書請降於漢六月姜維
出隴西自狄道進拔河間臨洮徐質與
維戰殺將軍張嶷漢兵乃還。狄道今
熙州渭州臨洮今洮州所治臨潭縣河
間當作

延熙十八年姜維出師至狄道與魏將王

經戰大破之。經退保狄道城。維駐兵鍾提。維將數萬人至抱罕。趨狄道。魏陳泰救其將王經進屯狄道。須泰軍到東西合。勢泰進軍陳倉。經所統諸軍於故關與漢人戰不利。經輒渡洮水與維戰於洮西。大敗。以萬餘人還保狄道城。維進圍之。鄧艾與陳泰并力拒維。泰謂諸將曰：「姜維提兵深入當挫其銳氣。」王經與戰。使賊得計。經既破走。維若進兵東向。據櫟陽。積穀之實。放兵收降。招納羗胡東。

爭關隴。傳檄四郡。此我之所惡也。而乃以乘勝之兵挫峻城之下。孤軍遠僑。糧谷不繼。是我破賊之時也。遂進軍度高山。城嶺潛行。夜至狄道東南高山上。多舉烽火。鳴鼓角。維不意。救兵卒至。緣山急攻。泰與交戰。維遁走。退駐鍾提。○抱罕。今河州洮水源出西羗中。北至抱罕。東入河狄道。今熙渭坊州地。鍾提在古狄道縣。

延熙十九年姜維出師攻祁山。趣上邽。鄧

艾與戰敗績

姜維在鍾提鄧艾曰洮西之敗非小失也今彼以船行吾以陸軍勞逸不同伏道隴西南安祁山各當有守彼專為一我分為四彼從南安隴西因食羗穀若趣祁山熟麥千頃為之外倉賊有豎計其來必矣維率衆出祁山聞艾以有備乃回從董亭趣南安艾據武城山以拒之維與艾爭險不克其夜渡渭東山緣山趣上邽艾與戰於段谷大破之○狄

道今熙州隴西今渭州南安今鞏州祁山今長道縣渭水出今隴州渭州之間上邽今秦州段谷水出秦州清水縣東山下

延熙二十年姜維出駱谷次于芒水

維聞魏分關中兵以赴淮南欲乘虛向秦川率數萬人出駱谷至沈嶺時長安積穀甚多鄧艾進兵據之以拒維維壁於芒水數挑戰艾不應○駱谷在盩厔縣沈嶺寰宇記云姜維嶺在縣南五十

里長城在華州華陰縣秦晉分界處芒水注水經云出南芒谷

景耀二年督漢中胡濟屯漢壽將軍王含守樂城護軍蔣斌守漢城

初昭烈留魏延鎮漢中實兵諸圍以禦外敵及姜維用事建議以為錯守諸圍適可禦敵不獲大利不若歛兵聚穀退就漢樂二城聽敵入平重關頭鎮守以捍之敵攻關不克千里運糧自然疲乏引退之日然後諸城併力搏之此殄敵

之術也後主從之○漢城在沔陽今西縣樂城在成固今洋州杜佑通典云洋川郡之西鄉興道洋源皆為漢成固舊地今非故境矣漢壽在今利州

論曰蜀之門戶漢中而已漢中之險要在漢魏則陽平而已武侯之用蜀也固陽平之圍守而分二城以嚴前後之防其守也使之不可窺而后其攻也使之莫能禦此敵所以畏之如虎也今姜維之退屯漢壽也徹漢中之備而為行險

僥倖之計則根本先撥矣異時鍾會長驅而入漢中曾無一人之守而敵已欣然得志初不必鄧艾之出江油而蜀已不支不待知者而后能見嗚呼姜維之亡蜀也殆哉

景耀五年姜維出師洮陽與鄧艾戰取于侯和維退往沓中

侯和城名其後符秦使王撫守侯和

鄧艾鍾會取蜀

後主景耀六年魏遣鄧艾鍾會等伐蜀取

之

魏大興徒衆命鄧艾鍾會諸葛緒等數道並攻姜維先表後主聞鍾會治兵關中欲規進取宜遣張翼廖化督諸軍分護陽安關口及陰平之橋頭以防未然漢主不聽鄧艾自狄道趣甘松沓中以連綴姜維雍州刺史諸葛緒督三萬人自祁山趣武街橋頭絕維歸路鍾會統十餘萬衆分徙斜谷駱谷子午谷趣漢中漢人聞魏兵至乃遣廖化將兵詣沓

中為姜維繼援張翼董厥等請陽安關
口為諸圍外助勅諸圍皆不得戰退保
漢樂二城城中各有兵五千人翼厥比
至陰平聞諸葛緒將向建威鍾會率諸
軍平行至漢中鍾會使李輔圍王含於
樂城荀攸圍蔣斌於漢城會徑過西趣
陽安口遣人祭諸葛亮墓鍾會聞關口
已下長驅而前鄧艾遣天水太守王頌
直攻姜維營維聞鍾會諸軍已入漢中
引兵還頌等追躡於強川口大戰維敗

走遂還至陰平合集士衆欲赴關城未
到聞其已破退趣白水遇廖化張翼董
厥等合兵守劍閣以拒會維列營守險
會攻之不能克糧道險遠軍食乏欲引
還鄧艾上言賊已摧折宜遂乘之若徒
陰平由邪徑經漢德陽亭趣涪出劍閣
西百里去成都三百餘里奇兵衝其腹
心出其不意劍閣之守必還赴涪則會
方軌而進劔閣之軍不還則應涪之兵
寡矣遂自陰平行無人之地七百餘里

鑿山通道造作橋閣山高谷深至為艱
險又糧運將匱瀕於危殆艾以糧自裹
推轉而下將士皆攀木緣崖魚貫而進
先登至江油蜀守將馬邈降諸葛瞻督
諸軍樞艾至涪停住不進艾遂長驅而
前擊破瞻前鋒瞻退住綿竹列陣以待
艾遂與子尚俱死之譙周勸後主出降
後主從其計北地王諶哭於昭烈之廟
先殺其妻子而後自殺後主又遣使喻
姜維使降鍾會維降將士以刃擊石○

陽安關口即陽平關陰平橋頭即今文
州橋頭在白水上水經注云白水東北
逕橋頭甘松城名在秦州其後乞伏國
仁升以為郡今廢松州是也沓中近其
松其後主澄自孱陵欲奔沓中

蜀鑑卷第三

蜀鑑卷第四

晉王濬自蜀平吳

晉武帝泰始十年吳大司馬陸抗率

抗疾病上疏曰西陵建平國之蕃表既
處上流受敵二境若敵沉舟順流星奔
電邁非可恃援他部以救倒懸也此乃
社稷安危之機非徒封疆侵凌小害也
臣父遜昔在西垂上言西陵國之西門
雖云易守亦復易失若有不守非但失
一郡荊州非吳有也如其有虞當傾國

爭之乞特詔簡閱使臣所部足滿八萬
省息衆務併力備禦臣死之後乞以西
方爲屬。西陵今峽州建平今歸州
咸寧二年征南將軍羊祜上疏請伐吳
祜鎮襄陽與陸抗對境嘗與抗連和會
抗卒祜上疏曰蜀平之時皆謂吳當并
亡十有三年矣蜀之爲國非不險也皆
云一夫荷戟千人莫當及進兵之日曾
無藩籬之限乘勝席卷徑至成都漢中
諸城皆鳥栖而不敢出非無戰心誠力

不足相抗也及劉禪請降諸營堡索然
俱散今江淮之險不如劍閣孫皓之暴
過於劉禪吳人之困甚於巴蜀而大晉
兵力盛於往時今若引梁益之兵水陸
俱下荆楚之衆進臨江陵平南豫州直
指夏口徐楊青兗並會秣陵以一隅之
吳當天下之衆勢分形散所備皆急也
漢竒兵出其空虛一處傾壞則上下震
蕩雖有知者不能爲吳謀矣咸寧四年
祜病求入朝面陳伐吳之計且曰平吳

之後當勞聖慮耳還鎮舉杜預為鎮南
將軍都督荊州諸軍事

咸寧五年益州刺史王濬上疏請伐吳

羊祜以王濬為益州太守濬大治舟艦
木梯蔽江而下乃上疏曰孫皓荒淫凶
逆宜速征伐臣作船七年日有朽敗領
無失事機

太康元年王濬唐彬會杜預王渾諸軍伐

吳

大舉伐吳王渾出江西杜預出江陵王

濬唐彬下巴蜀王濬唐彬擊破丹陽吳
人於江積要害之處並以鐵鎖橫截之
又作鐵錐長丈餘暗置江中以逆相舟
艦濬作大筏數十方百餘步縛草為人
被申持伏令善水者以筏先行遇鐵錐
錐輒著筏而去又作火炬長十餘丈大
數十圍灌以麻油在舡前遇鎖然炬燒
之須臾融液斷絕於是舡無所礙。丹
陽城屬秭歸

王濬克西陵克荊門夷道二城

杜預進攻江陵克之預等分兵以益濟攻武昌克之

王濟自武昌徑趣建業入于石頭吳主皓請降

王濟既至西陵杜預與之書曰足下既摧其西藩便當徑取建業討累世之逋寇釋吳人於塗炭亦曠世一事也濟自武昌徑趣建業兵甲滿江旌旗燭天威勢甚盛吳潘濬入見吳主吳主問水軍消息對曰蜀舡皆外今得二萬兵乘大

舡以戰自足破之於是合衆授潘濬節鉞明日當發其衆悉潰王渾遣信要王濟暫過論事濬舉帆直指建業報曰風利不得泊也是日濬戎卒八萬方舟百里鼓譟入于石頭吳主皓面縛與觀詣軍門降○建業建康府石頭城在建康論曰秦自蜀伐楚未大得志也王濟以益州之力破丹陽克西陵下荊州攻武昌片帆而直指建業遂平江東其功偉矣蜀係於上流之安危亦大彰明較著

矣晉武之平吳用蜀之力如此而子孫
之偏安於江東者乃棄蜀弗顧可勝責
哉

李特入蜀

晉惠帝元康八年巴氏流人李特等自略
陽入蜀

初張魯在漢中賓人李氏自巴西宕渠
往依之魏武克漢中李氏歸之遷于略
陽號曰巴氏其孫特庠流皆有材武關
中荐飢略陽天水等六郡民流移就穀

入漢川者數萬家道路窮乏特兄弟振
救之由是得衆心流民至漢中上書求
寄食巴蜀詔書不聽勅關禁之戶曹李
恣開關放入散在梁益不可禁正李特
至劍閣太息曰劉禪有如此地面縛於
人豈非庸才邪

永康九年李特入成都殺前益州刺史趙
廡

趙廡陰有據蜀之志以李特兄弟材武
厚遇之詔徵廡為大長秋以耿滕為益

州刺史廡逐殺滕自稱益州牧任用李
庠庠驍勇得衆廡心忌之會庠勸廡稱
號廡斬之李特李流怨廡引兵軍綿竹
廡遣費遠浙北道屯綿竹之石亭李特
收兵得七千餘人襲遠等軍破之遂進
攻成都廡走廣都為徙者所殺

羅尚討李特

永寧元年詔羅尚為益州刺史

特等聞尚來甚懼以牛酒勞尚於綿竹
牙門將王敦廣漢太守辛冉勸尚誅特

尚不從

符下秦雍召還流民入蜀者以李特為宣
威將軍

朝廷符下秦雍使召還流民又遣御史
督之李特兄輔自略陽至蜀言中國方
亂不足復還特然之累遣天水關式詣
羅尚求權停至秋朝廷論討趙廡功拜
特宣威將軍弟流奮威將軍皆封侯璽
書下益州條列流民與討廡者將加封
賞辛冉寢朝命不以實上衆咸怨之羅

尚督流民限七月上道時流民布在梁益為人傭力聞州郡逼遣人人愁怨不知所為特復遣閻式詣尚求停至冬辛冉李苾以為不可尚舉別駕杜玆秀才式為玆說逼移利害玆亦欲寬流民一年尚不從冉苾與尚謀欲殺流民取其資貨尚移書令梓潼太守張演於諸要施閉搜索寶貨特數為流民請留流民皆相率歸特特又以計激怒之旬月之間歸特者二萬人流亦聚衆數千人特

又遣閻式詣尚告諸流民今聽寬矣式至綿竹勸特深宜為備特從之

廣漢太守辛冉捷為太守李苾襲李特營不克特攻冉於廣漢冉敗奔德陽特據廣漢遂攻羅尚於成都

尚頻為特所敗乃阻長營緣郫水作營連延七百里與特相拒

太安元年以張微為廣漢太守軍德陽特攻微取德陽以其將蹇碩守之李驥李流進攻成都

太安二年詔荊州刺史宗岱建平太守孫
阜帥水軍三萬以救羅尚阜進逼德陽特
遣任臧拒之

羅尚遣兵討特斬之傳首洛陽

孫阜破德陽獲蹇碩任臧退屯涪陵

李流至成都羅尚閉城自守

李雄襲擊孫阜軍大破之宗岱卒於墊江

荊州軍遂退

雄特子德陽令遂寧府墊江今合州涪

陵今涪州荊州之軍自墊江上也

李雄入成都

太安二年李雄攻殺汶山太守陳圖遂取

郫城李流徙屯郫

汶山今茂州郫城今郫縣

李流卒李雄自稱益州牧治郫城

羅尚襲郫城不克退保太城

李驤攻犍為斷羅尚運道獲太守襲恢殺
之

犍為時治武陽今犍為縣輿地廣記云
即武陽縣地犍為郡由郡嘗治此而得

名也近世為江鄉志者乃謂治今彭山
非是

李雄攻羅尚尚由牛鞞水東下雄入成都
牛鞞今簡州陽安縣即中水也入江陽
都江

羅尚抗李雄

永興元年羅尚至江陽

尚遣使表狀詔尚權統巴東巴郡涪陵
以供軍賦尚遣別駕李興詣荊州劉弘
求糧弘納紀以運道阻遠且荊州自空

乏欲以零陵米五千斛與尚弘曰天下
一家彼此無異吾今給之則無西顧之
憂矣又遣治中何松屯巴東為尚後繼

○巴東今歸州

羅尚移屯巴郡遣兵擊蜀獲李驥妻谷氏
及子壽

巴郡治江州今夔州重慶府

永嘉元年尚施置閑戍至漢安夔道

漢安今資州夔道今叙州戍漢安所以
防中水戍夔道所以防大江尚在江州

而設戍於此則犍為南安以西皆為雒
有也

秦州流民鄧定等據成固掠漢中李雄遣
李離等助之遂陷南鄭離等引還盡徙漢
中民於蜀漢中人句方白洛帥吏民還守
南鄭

永嘉二年雄遣將軍李鳳屯晉壽以寇漢
中詔以張光為梁州刺史治新城

晉壽漢葭萌縣昭烈改為漢壽晉秦始
中改為晉壽新城魏文帝分漢中立新

城郡治房陵

天水司鏞琦殺雄太尉以梓潼降尚驤及
琦等戰敗死

永嘉四年荊州牧劉弘表譙登為梓潼內
史登進攻宕渠殺雄巴西太守還據涪城
登譙周孫居巴西雄巴西太守馬脫殺
登父登詣劉弘請兵復譙弘表登為梓
潼內史使募三巴蜀漢民為兵克復州
郡登進攻宕渠殺馬脫食其肝會梓潼
降登進據涪城雄自攻之為登所敗

涪城今綿州

雄以李國鎮巴西天水文石殺國以巴西
降尚

巴西治閬中晉志充國宕渠安漢皆屬
巴西郡

折衝將軍張羅進據捷為之合水

華陽圖志云巴蜀為語曰譙登治涪城
文石在巴西張羅守合水巴氏那得前
○合水在今嘉定府龍遊縣青衣水出
於廬山之徼外合於岷江故謂之合水

雄遣張寶襲梓潼司琦等奔巴西

秋七月散騎常侍都督梁益二州夷陵侯
羅尚薨

論曰李特父子乘晉室之亂跳梁於蜀
土一羅尚庸人耳徒以晉室方伯之權
猶能誅特而抗雄雄雖僭號於蜀漢中
三巴之地固非其有也當是時中原政
亂劉弘雖死而琅瑯在建業陶侃在武
昌蜀之衣冠南下荊州者十餘萬譙登
等猶能崛起以自立使江左君臣有跨

有利益之規模任陶侃以討賊之責驅
蜀土之人士西歸以興復則雄豈遂為
逋誅不討之寇哉惜乎茂弘士行為謀
之不遠而遂委蜀於蠻夷也

李雄偽定蜀地

永嘉四年以皮素為益州刺史羅宇殺素
于巴郡達平都尉暴重殺宇官屬表韓松
為刺史治巴東

李雄遣李驤攻譙登于涪城羅尚之子
宇惡登不給其糧皮素至巴郡欲治宇

罪羅宇使人夜殺之暴重還殺宇巴都
亂官屬表監軍韓松為刺史

永嘉五年李驤拔涪城梓潼太守譙登死
之遂拔巴西太守文石死之始定巴西梓
潼地

驤攻登于涪城登食盡援絕驤攻之急
士民皆重鼠食之餓死甚眾無一人叛
者正月拔之遂乘勝拔巴西殺文石於
是巴西梓潼為雄有雄大赦改元玉衡
譙登至成都不屈雄殺之

雄遣師攻夔道犍為太守魏紀棄城走江陽太守姚襲死之

夔道今叙州犍為治今叙州犍為縣資中牛鞞南安諸邑皆隸焉江陽今瀘州雄始定其地

氏隗文等作亂暴重討之重殺刺史韓松自領其事

隗文等反於宜都在峽州

巴東將吏殺暴重表巴郡太守張羅行三府事羅與隗文等戰死之表王異行刺史

隗文等驅略吏民以降于雄

華陽國志曰巴中無復餘種矣三府事謂平西將軍益州刺史西夷校尉

江陽太守張啓殺刺史王異而代之啓率官屬表潼陵太守向沈代啓南保洛陵

愍帝建興元年向沈率蜀郡太守程融等表汶山太守蘭維為西夷校尉維將吏民北出至巴東雄將李恭費黑等獲之

於是自巴郡以東皆為雄有矣

涪陵王運巴西王建寇漢中梁州太守張

光遣參軍晉邈擊殺之建子壻楊虎收餘衆屯于厄水光遣子孟萇討之不克

厄水在南鄭縣東

武都氏王楊難敵遣兵救楊虎擊張孟萇孟萇敗績死之光卒州人立胡子序領梁州楊虎難敵攻序序棄城走

建興二年漢中氏張咸等逐楊難敵以其地降于雄遂定漢中

雄以李夙為梁州刺史仕回為寧州刺史李恭為荊州刺史

以鳳理漢中回謀南中恭控巴東也

蜀人杜弼等流徙荆湘

晉太安二年益州流民十餘萬戶徙荊州

李特之亂三蜀民流迸南入東下城邑

皆空野無烟火其入荊州者十餘萬戶

西羈旅貧乏鎮南將軍劉弘大給其田及

種糧擢其賢才隨才授用流民稍安

永嘉五年蜀人李驤殺樂鄉縣令南平太

守應詹醴陵令杜弼擊破之

巴蜀流民布在荆湘間數為土民所侵

苦蜀人李驥聚衆據樂鄉應詹與杜波
擊破之波字景文蜀郡成都人祖植有
名蜀土才學著稱州舉秀才為成都別
駕巴氏流民入蜀羅尚督追之波勸尚
寬流民一年尚不從波致秀才板歸家
李特反波避地荊州應詹愛其才而禮
之辟為醴陵令驥聚衆屯樂鄉波擊破
之

荊州太守王澄討驥驥請降澄許而襲殺
之以其妻子為賞沈八千餘人於江

益州流民起兵湘州奉杜波為主南破零
桂東掠武昌

李驥既死流民益怨恨杜疇蹇撫等復
擾湘州參軍馮素與流民汝班蹇碩等
不協言於刺史荀眺白流人皆欲反眺
以為然欲盡誅流人班等懼死聚衆以
應疇杜波時在湘中衆共推為主耿委
城走攻下郡邑

征南將軍山簡鎮夏口波具陳其事簡等
率

王澄遣王機擊彼不克澄徙治孱陵

永嘉六年以周顛為荊州刺史王敦遣陶

侃尋陽太守甘卓共擊彼王敦殺王澄

顛始至州建平流民傳密等叛迎杜彼

彼遣別將王真襲沔陽顛狼狽失據王

敦誣王澄與彼通信縊殺之

建興元年周顛屯潯陽彼掠其人口陶侃

遣朱伺救之伺大破彼師于武昌拜侃荆

州刺史

陶侃兵敗于杜曾王敦表侃白衣領職侃

帥周訪等進擊杜彼大破之復侃官

杜彼

按當是強 以並為

應詹請降於瑯琊王

王詒之

彼遺應詹書曰天步艱難始自吾州州

黨流移在於荆土其所遇值蔑之如遺

頓伏死亡者略復過半備嘗荼毒足下

所鑒也容主難久嫌隙易結不謂樂鄉

起變出於不意時與足下思散凝結求

擒其黨帥惟患筭不經遠力不隔堅耳

及在湘中懼死求生遂相結聚欲守善

王澄遣王機擊彼不克澄徙治孱陵

永嘉六年以周顛為荊州刺史王敦遣陶

侃尋陽太守甘卓共擊彼王敦殺王澄

顛始至州建平流民傳密等叛迎杜彼

彼遣別將王真襲沔陽顛狼狽失據王

敦誣王澄與彼通信縊殺之

建興元年周顛屯潯陽彼掠其人口陶侃

遣朱伺救之伺大破彼師于武昌拜侃荆

州刺史

陶侃兵敗于杜曾王敦表侃白衣領職侃

帥周訪等進擊杜彼大破之復侃官

建興三年杜彼移書應詹請降於瑯琊王

王許之

彼遺應詹書曰天步艱難始自吾州州

黨流移在於荆土其所遇值蔑之如遺

頓伏死亡者略復過半備嘗荼毒足下

所鑒也客主難久嫌隙易結不謂樂鄉

起變出於不意時與足下思散凝結求

擒其黨帥惟患筭不經遠力不陷堅耳

及在湘中懼死求生遂相結聚欲守善

自衛天下小定然後輸誠盟府尋山公鎮夏口即具陳之此公鑒閼塞之會察窮通之變納吾於衆疑之中非高識之覩孰能若此西州人士得沐浴於清流豈惟滌蕩瑕穢乃骨肉之施此公薨逝斯事中廢賢愚痛毒竊心自悼欲遣滕永大張休豫諸大府備列起事以來本末但恐貪功徇名之徒將讒間於聖主之聽戮吾使於市朝以彰叛逆之罪故未敢遣之而甘陶率至水陸十萬旌旂

擢於山澤舟艦侈於三川威則威矣然吾衆竊未以為懼晉文伐原以全信為本故能使諸侯歸之陶侃宣赦書而繼之以進討豈所以崇奉明詔示軌憲於四海逼向義之夫以為叛逆之虜歟思善之衆以極不赦之責非不戰而屈人之美也驅略烏合欲與為死者求一戰未見爭衡之微權也吾之赤心貫於神明西州人士卿粗悉之耳寧當令抱柱於時不證於大府耶昔虞鄉不營大國

之相與魏齊同其安危司馬遷明言於
李陵雖刑殘而無慨足不抗威千里聲
播岷衡進宜為國思靜難之略退與舊
交措枉直之正不亦綽然有餘裕乎望
卿騰吾牋令時達盟府遣大使之臨使
吾得披露肝膽沒身何恨哉伏想盟府
必結細於紀綱為一康於聖世使吾廁
列義徒負戈前驅迎皇輿於閭闔掃長
地於荒裔雖死之日猶生之年也若欲
掃清方夏却定中原吾得一年之糧使
沂流西歸夷李雄之逋寇修禹貢之舊
獻展微勞以補往愆復州邦以謝鄰國
亦其志也惟所裁處耳吾遠州寒士與
足下出處殊倫誠不足感神交而濟其
傾危但顯吾忠誠則汶嶽存忠順之恕
衡湘無伐叛之虞惟足下宏納之望極
吾徒陷溺之艱焉可金玉其音哉然顯
顯十餘萬口亢勞瘁於警備思放逸於
南畝矣衡嶽江湘列吾左右若往言有
貳血誠不亮益梁受殃不惟鄙言而已

詹甚哀之乃啓呈被書并上言曰被益州秀才素有清望文理既優幹事兼美往因使流寓居詹郡界其真心堅白詹所委悉李驥為變樂鄉劫略良善被時出家財招募忠勇登壇歃血義誠慷慨會驥攻燒南平被遂東流巴漢與湘中鄉人相遇推其素望遂相憑結論被本情非首作亂階者也然破湘州實被之罪亦由兵交其間遂使滋蔓按被今書血誠亦至矣昔朱鮪自疑於洛陽光武指河水以明心鮪感義歸誠終展力報施受封侯之寵尚恕過錄功也詹竊謂今者當厄運之會思弘遠猶故齊赦射鉤之誅晉貫斬祛之戮用能濟翼戴之高勲隆一康之美譽况被等素無斯愆而啓願投命邪以為可遣大使宣揚聖旨雲澤沾之於上百姓沐浴於下則上下交泰江左無風塵之虞矣○通鑑不載被與應詹書本末今具錄如右蜀土流移十萬餘家離散不保此大事也豈

宜略邪按此乃陶侃上憚王敦規模不
大不能招納彼等欲討殺以論功耳晉
史以成敗論人乃謂彼等請降於元帝
帝不許觀彼與詹書則先未嘗請降而
不許也又謂彼偽降於山簡皆非其實
讀史者以意逆志可也

以彼為巴東監軍使前南海太守王運受
其降諸將攻彼不已彼遂殺運遣其將王
貢入武陵五谿斷官軍運道

彼既受命諸將徇功者攻之不已彼不

勝憤怒殺運復反○武陵今常德府路

通五谿蠻

陶侃應詹進攻杜彼彼將王貢出降彼遁
走不知所在

侃等諸軍齊進彼乃逃遁不知所在城
中金寶淹目應詹一無所取惟取圖書
莫不歎之○晉史應詹傳稱賊中金寶
溢目應詹但取圖書豈有賊而載圖書
者乎此皆梁益流徙之衣冠也悲夫
論曰蜀之流民十餘萬家流徙東下劉

和季在江陵給其田疇山季倫在夏口
接其歸附庶乎招懷之略矣四方蹙蹙
江左獨安鄉瑯君臣念流離之及境隨
才授任援之甲兵反其鋒而用之李准
僭號而魚復江關曾莫之守固可長驅
而復舊物合二長以圖中原也王處仲
剛愎猜忍不忠王室陶士行亦不知此
乃以討杜被為莫大之功振旅紀勲由
此專任上流則亦陋矣哉愚觀士行與
溫太真共討蘇峻獨以不與顧命為歉
且持其區區之糧峙欲貳其勤王之誠
心事之不純抑亦可知是雖神機明鑒
克勤小物功烈之在晉者如彼其卑也
烏得為忠順如孔明者乎然巴氏至蜀
者二萬人耳而蜀土衣冠不務糾緝安鄉閭
為討僭逆守墳墓之計乃輕脆易驚率
然東下隕踣異鄉陷於誅死之罪杜被
之事其亦蜀土之永鑿歛

元溫討李勢

晉穆帝永和二年十一月荊州刺史元溫

伐蜀拜表遂行

溫將伐蜀將佐皆以為不可表喬勸之
曰李勢無道以民不附且恃其險遠不
脩戰備宜以精卒萬人輕齎疾趨比其
覺之我已出其險要可一戰擒也蜀地
富饒戶口繁庶諸葛武侯用之抗衡中
夏若得而有之國家之大利也溫從之
十一月辛未溫帥益州刺史周撫南郡
太守譙王無忌伐蜀拜表即行

溫軍泝魚復

諸葛亮造八陣圖於魚復平沙之上壘
石為八行行相去二丈溫見之謂此常
山蛇勢也○魚復今夔州奉節縣

永和三年三月溫軍至青衣漢主勢遣李
福李權向彭模沓堅引兵向捷為

福等自山陽趣合水諸將欲設伏於江
南以待晉兵沓堅不從引兵自江北駕
鸞碕度尚捷為○青衣今嘉州山陽在
席都合水今嘉定府龍游縣駕鸞碕華
陽國志寰宇記並載在今叙州南溪縣

督堅畏溫故迂路怯懦引兵自鴛鴦碛
向捷為也捷為今縣

溫至彭模督堅至捷為還自沙頭濟眾潰
溫至彭模議欲分為兩軍異道俱進以
分漢兵之勢袁喬曰今懸軍深入若分
兩軍萬一偏敗大事去矣不如全軍而
進齎三日糧示無還心勝可必也乃自
將步卒直指成都李福進攻彭模孫盛
等奮擊走之溫進遇李權三戰三捷督
堅至捷為乃知與溫異道還自沙頭津

後此至溫已軍成都之十里陌堅眾自
潰○沙頭在今崇慶府新津縣彭模今
眉州彭山縣

溫長驅至成都李勢降

勢悉眾出戰于笮橋袁喬督士卒戰大
破之勢與觀出降○舊史稱李勢夜遁
九十里至晉壽葭萌城然夜出降通鑑
亦言走至葭萌此俱誤也成都去葭萌
何但九十里勢降表言即日到白水城
姑少避溫降耳豈貞走至葭萌白水者

晉史大抵舛誤無法司馬公辨之亦時有不精耳

四月温振還江陵

温留成都三十日李勢降表以三月十

七日降温也○李特以惠帝之元康八年

八蜀特子雄雄傳姪班子期殺班李驥

子壽殺期壽傳子勢六世至永和三年

滅凡五十年

論曰李雄之據蜀也北不得漢中而瞿

唐灑預又無一夫之守一門悉開洞見

堂與元温之沂魚復也徘徊以觀八陣

之圖如入無人之境而遂制蜀之死命

呼然後知陶士行坐鎮别州四十

一年曾不加一矢於僭偽貞不忠於晉

室也哉

李壽縱獠於蜀

晉康帝建元元年蜀李壽從梓柯引獠入

蜀

李雄時嘗遣李壽攻朱提遂有南中之

地壽既篡位以郊甸未實都邑空虚乃

別州
蜀

晉史大抵舛誤無法司馬公辨之亦時有不精耳

四月溫振還江陵

溫留成都三十日李勢降表以三月十

七日降溫也○李特以惠帝之康八年

八蜀特子雄雄傳姪班子期殺班李驥

子壽殺期壽傳子勢六世至永和三年

滅凡五十年

論曰李雄之據蜀也北不得漢中而瞿

唐灑預又無一夫之守一門悉開洞見

堂與元溫之沂魚復也徘徊以觀八陣

之圖如入無人之境而遂制蜀之死命

矣嗚呼然後知陶士行坐鎮別州四十

一年曾不加一矢於僭偽貞不忠於晉

室也哉

李壽縱獠於蜀

晉康帝建元元年蜀李壽從梓柯引獠入

蜀

李雄時嘗遣李壽攻朱提遂有南中之

地壽既篡位以郊甸未實都邑空虛乃

徙傍郡戶三下已上以實成都人徙梓
柯引獠入蜀境自象山以北盡為獠居
蜀本無獠至是始出巴西渠川廣漢陽
安資中犍為梓潼布在山谷十餘萬落
時蜀人東下者十餘萬家獠遂挾山傍
谷與夏人參居參居者頗輸租賦在深
山者不為編戶種類漢蔓漢保據巖壑依
林履險若履平地性又無知殆同禽獸
諸夷之中難以道義招懷也○北史不
載李壽縱獠而言獠自出未知首禍之
因賴李膺益州記詳著其始惜司馬公
之不及此也象山未知何地
論曰蜀之衣冠流徙荆湘而名郡樂郊
皆為獠居矣至唐末而患猶未已也文
物之不逮於兩京幾數百年職此之由
自蜀通中國以來得禍未有如是之酷
且久也可不鑒哉

蜀鑑卷第五

江左不用蜀

晉咸康元年詔建威將軍司馬勲將兵安
集漢中漢王壽擊敗之壽遂置漢中守宰
戍南鄭而還

永和三年荊州刺史元溫伐蜀取之蜀故
將鄧定隗文等反入據成都征虜將軍楊
謙棄涪城退保德陽

涪城今綿州德陽今遂寧府

振威將軍蕭敬文殺楊謙于涪城遂取巴

西通于漢中

永和四年益州刺史周撫擊范賁斬之益

范長安字子昭

隗文等立為帝

梁州刺史司馬勳出駱谷破趙長城戍壁于懸鈎

趙主石虎死國亂雍州豪傑遣使告晉司馬勳帥眾赴之勳出駱谷破趙長城戍壁于懸鈎去長安二百里使治中國煥攻長安斬京兆太守劉秀離又拔賀

城三輔豪傑多殺守令以應勳凡三十餘壁眾五萬人○水經注渭水之東駱谷之水出其南山洛谷水北流迳長城西

司馬勳釋懸鈎拔宛城殺趙南陽太守袁

景復還梁州

宛城南陽縣

永和十年元溫大舉伐秦遣司馬勳出子午道

溫統步騎四万發江陵水軍自襄陽入

西通于漢中

永和四年益州刺史周撫擊范賁斬之益州平

賁范長生之隗文等立為帝

梁州刺史司馬勳出駱谷破趙長城戍壁于懸鈎

趙主石虎死國亂雍州豪傑遣使告晉司馬勳帥眾赴之勳出駱谷破趙長城

戍壁于懸鈎去長安二百里使治中國煥攻長安斬京兆太守劉秀離又拔賀

城三輔豪傑多殺守令以應勳凡三十餘壁眾五萬人○水經注渭水之東駱谷之水出其南山洛谷水北流迳長城西

司馬勳釋懸鈎拔宛城殺趙南陽太守袁景復還梁州

宛城南陽縣

永和十年元溫大舉伐秦遣司馬勳出子午道

溫統步騎四万發江陵水軍自襄陽入

均口至南鄉步兵自浙川趣武關。○子午道從杜陵徑漢中均口南鄉浙川皆在今鄧州武關。今商川春秋左傳哀公四年少習即武關也。

司馬勲掠秦西鄙

元溫別將進擊青泥城破之涼秦州刺史王擢攻陳倉以應溫秦主健遣太子萇等帥衆五萬軍于峽柳以拒溫夏四月己亥溫與秦兵戰于藍田大敗之元冲又敗秦丞相雄于白鹿原溫至灊上

秦太子萇退屯河南秦主健與老弱六千固守長安小城悉發精兵与萇合兵以拒溫三輔郡縣皆來降耆老有垂泣者曰不圖今日復見官軍。○泥水水經注北歷峽柳城魏置青泥軍於城內故謂之青泥城即峽柳關亦名藍田關白鹿原三秦記云周平王東遷之後有白鹿遊此因得名並在京兆府藍田縣秦丞相雄帥騎七千襲司馬勲于子午谷破之勲退屯女媧堡

女媧堡寰宇記云藍田山有女媧氏火
或云今金州有女媧山非也

秦丞相雄擊司馬勲於陳倉勲奔漢中

王猛謂元溫曰公不遠數千里深入敵
境長安咫尺而不度灃水百姓未知所
以不至溫兵不利溫指秦麥以為糧既
而秦人芟麥清野以待之溫軍乏食六
月徙關中三千餘戶而歸司馬勲自陳
倉奔漢中涼秦州刺史王擢亦奔略陽
○灃水出京兆府萬年縣灃城秦繆公
所築

哀帝興寧三年益州刺史周撫卒以其子
捷為太守楚代之

撫在益州三十餘年甚有威惠

梁州刺史司馬勲舉兵及圍周楚于成都
大司馬溫遣朱序救之

勲常有據蜀之志憚周撫不敢發及撫
卒遂舉兵反引兵入劍閣圍周楚于成

都

海西公太和元年荊州刺史元豁遣元羆

攻南鄭討司馬勲朱序周楚擊司馬勲獲
之大司馬溫斬勲傳首建康

簡文帝咸安元年益州刺史周楚卒以寧
州刺史周仲孫為益州刺史

大司馬溫以梁益多寇周氏世有威名
乃以周仲孫代楚守蜀

孝武帝寧康元年秋七月大司馬溫薨

論曰晉室南渡中原非復晉有猶曰五
胡崛起力未易支也若夫吳蜀唇齒之
邦孫劉連衡用之以抗曹魏矣元溫之

取蜀也擇忠信之長嚴毅之帥藩聚其
生齒教誨其人民招集其流離驅遠其
蠱賊庶幾積年之汙俗咸與惟新然後
命一將以出秦川而自將以向宛洛孔
明之志庶幾少伸矣哉軍至灞上徒出
而歸司馬勲犄角之師曾何足仗西土
之憂未艾也溫死而符堅得蜀矣堅疑
之難信乎

符堅取蜀

晉寧康元年秦王堅使王統朱彤帥卒二

萬出漢川毛當徐成帥卒三萬出劔門入
寇梁益

梁州刺史楊亮帥巴獠萬餘拒之戰于青
谷亮兵敗奔西城彤遂拔漢中徐成攻劔
門克之

青谷未詳西城今金州劔門今隆慶府
秦梁州刺史楊安進攻梓潼太守周虓守
涪城母為朱彤所獲虓遂降於安安克梓
潼

荊州刺史元豁遣江夏相竺瑤救梁益瑤

聞廣漢太守趙長死引兵退益州刺史周
仲孫勒兵至綿竹帥騎五千奔于南中

秦遂取梁益二州叩笮夜即皆附於秦
仲孫坐失守免官

秦符堅以楊安為益州牧鎮成都毛當為
梁州刺史鎮漢中姚萇為寧州刺史屯墊
江王統為南秦州刺史鎮仇池

墊江今合州仇池今成州

元冲以毛虎生為益州刺史鎮建平太守
以虎生子球為梓潼太守虎生與球伐秦

至巴西以糧乏退屯巴東

建平今歸州巴西治今閬州巴東治今夔州

寧康二年蜀人張育楊光起兵擊秦遣使來請兵秦王堅遣鄧羗討之

益州刺史竺瑤威遠將軍元石虔帥衆三萬攻墊江姚萇兵敗退屯五城瑤石虔屯巴東

五城今潼川府中江縣晉屬廣漢郡縣有五城山故名臧宮破延岑亦於此地

張育與巴獠酋帥張重尹萬等五萬餘人進圍成都秦楊安鄧羗襲育敗之八月鄧羗敗晉兵于涪西楊安敗張重尹萬于成都南重死斬首二萬三千級鄧羗擊張育楊光于綿竹皆斬之

益州復入于秦○符堅雖得蜀而夔路未嘗失所以晉不久復得之也

晉孝武太元三年秦梁州刺史苻鍾圍魏興太守苦挹於西城

秦既得蜀遣長樂公丕等攻襄陽明年

拔之韋鍾遂圍西城○魏興在今金州
治西城縣

太元四年右將軍毛虎生帥衆三萬擊巴
中以救魏興秦將張紹等敗之虎生退屯
巴東韋鍾拔魏興吉挹死之

寰字記吉挹為梁州督為符堅所攻於
縣南九里峻山築城攻圍不下名吉挹
城巴中今夔路巴東今夔州

太元六年秦王堅以裴元略為巴西梓潼
二郡太守使密具舟師

穆帝永和三年於梓潼郡僞置巴西治
今綿州符堅因之

太元八年十一月符堅入寇大敗于淝水
晉復取蜀

太元八年夏五月元冲帥衆十萬伐秦遣
輔國將軍楊亮攻蜀拔五城進攻涪城秦
遣張蚝姚萇救涪城張蚝出斜谷亮引兵
還

元冲教伐秦蜀無功而還但拔蜀兩邑
○五城今潼川府中江縣涪城今綿州

太元九年梁州刺史楊亮帥衆五万伐蜀遣巴西太守費統等將水陸兵三萬為前鋒亮屯巴郡秦遣王廣康回拒之

巴郡治今重慶府巴縣

姚萇擊秦王堅秦益州刺史王虬帥蜀漢之衆三萬北救長安

秦梁州刺史潘猛棄漢中奔長安

太元十年秦益州刺史王廣以李丕為益州刺史守成都廣帥所部奔還隴西蜀人隨之者三万餘人

丕蜀人為江陽太守○秦政方亂而蜀人之歸秦者三萬人以夷獠亂其城邑而晋不暇謀也

蜀郡太守任權攻拔成都斬秦刺史李丕復取益州

以廣州刺史羅友為益州刺史鎮成都

劉裕討譙縱

晋安帝元興二年桓玄僭位益州刺史毛璩傳檄遠近討之進屯白帝

玄僭位遣使加璩散騎常侍璩執留玄

使不受其命玄以栢希戍三巴以備之
璩傳檄遠近列玄罪狀遣巴東太守羅
述征虜司馬甄季之擊破希等仍率衆
次于白帝。白帝今夔州

毛脩之及馮遷斬玄于江陵

玄以乘輿幸江陵將之漢中屯駙校尉
毛脩之璩之弟子也誘玄入蜀遂與毛
裕之費恬擊玄益州背護漢嘉人馮遷
抽刀斬玄乘輿反正于江陵

栢振復陷江陵

毛璩遣將攻漢中斬栢希

義熙元年毛璩帥衆三萬順流東下討栢
振璩遣其弟瑾出外水參軍譙縱反殺毛
瑾於涪城璩還成都為縱等所殺

毛璩遣其弟瑾瑗出外水參軍譙縱侯
暉出涪水蜀人不樂遠征暉至五城水
口謀作亂縱為人和謹蜀人愛之共逼
縱為主縱不可走投于水引出以兵逼
縱登輿縱又投地固辭暉縛縱於輿龍
毛瑾於涪城殺之璩至略城聞變奔還

成都益州營戶李騰開城納縱兵殺璩
及弟瑗。外水今大江也。庾仲雍云江
州縣對二水口。右則涪內水，左則蜀外
水。內外水之所以名也。江州縣即今重
慶府涪水。水經云出廣漢涪縣，至水廣
漢南入于墊江。所謂內水也。涪今綿州
墊江。今合州內水之原委也。五城水口
在鄆縣。今中江縣水也。中江縣自有一
水入于涪。即後漢志云廣漢郡有沈水。
臧宮嘗破延岑于此。水注水經云江水

又東絕綿洛。迤五城界至廣都北岸南
入于江。謂之五城水口。此甚誤。江水未
嘗絕綿洛。又迤五城而至廣都涪水。亦
未嘗迤五城。與綿洛初無相干。廣都又
在五城之上，非下流也。舛誤甚矣。大抵
蜀自後漢以來，由廣漢而下涪水，多迤
五城。亦爭戰之地。今中江縣也。

義熙二年，益州刺史司馬榮期擊譙明子
于白帝，破之。

譙縱以弟洪為益州刺史，明子為巴州

刺史屯白帝

劉裕遣龍驤將軍毛脩之將兵與司馬崇期等討之脩之至岩渠崇期為參軍楊承祖所殺脩之退還白帝

岩渠宋於墊江置東岩渠郡今合州

義熙三年毛脩之與漢嘉太守馬遷擊楊承祖斬之

馬遷漢嘉人手刃栢玄者為御郡太子劉裕表襄城太守劉敬宣伐蜀以劉道規為征蜀都督

義熙四年劉敬宣與諸將至黃虎譙縱遣譙道福拒之敬宣引軍還

劉敬宣既入峽遣巴東太守溫祚以二千人出外水自帥益州刺史鮑陋及將軍文處茂時延祖等由墊江轉戰而前譙縱求救於秦王秦王興遣姚賞王敏將兵二萬赴之敬宣軍至黃虎去成都五百里縱遣譙道福悉眾拒險相持六十餘日敬宣不得進食盡軍中疾疫死者太半乃引軍還○黃虎在今潼川府

通泉縣寰宇記云有黃許川

義熙六年譙縱遣昝謙譙道福寇荊州荊州刺史劉道規大破之于枝江

謙等大陳舟師兼以步騎戰於枝江檀

道濟先進陷陳謙等大敗道規追斬謙

○枝江今江陵府枝江縣

譙道福陷巴東

益州刺史鮑陋卒道福陷巴東殺守將

溫祚時延祖○巴東今夔州

義熙八年太尉劉裕以朱齡石為益州刺

史帥滅熹劉鍾等伐蜀

義熙九年六月朱齡石徙外水入成都滅

熹徙中水入廣漢

裕與齡石密謀進取曰劉敬宣往年出

黃虎無功而退賊謂我今應徙外水往

而料我當出其不意猶徙內水來也如

此必以重兵守涪城以備內道若向黃

虎正墮其計今以大衆自外水取成都

疑兵出內水此制敵之奇也裕慮此聲

先馳賊知虛實別有函書封付齡石曰

至白帝乃開朱齡石等至白帝發函書
曰衆軍悉從外水取成都滅熹從中水
取廣漢老弱乘高艦十餘從內水向黃
虎於是諸軍涪道兼行。外水都江水
自江陽南安平模入成都內水涪水自
墊江德陽黃虎上涪中水發源為綿洛
涪三水自江陽沂流上富義資中牛鞞
上廣漢

論曰劉裕之發函書即岑彭自墊江還
江州沂都江上武陽之故智也

譙道福鎮涪城

以備內水

譙縱遣侯暉譙詵帥衆萬餘屯平模朱齡
石帥諸軍攻克之

齡石至平模去成都二百里侯暉譙詵
夾岸築城以拒朱齡石以天時盛熱欲
養銳息兵劉鍾曰不然賊阻兵守險者
懼不敢戰也盡銳攻之其勢必克若
兵相守彼知人虛實譙道福以涪軍來
我求戰不獲軍食無資二萬餘人悉為

蜀虜矣齡石從之諸將以水北城地險
兵多欲先攻其南城齡石曰今屠南城
不足以破北若盡銳以拔北城則南城
不麾自潰矣秋七月攻北城克之斬侯
暉譙說○平模今彭山縣

譙撫之屯牛鞞譙小苟塞打鼻滅熹擊撫
之斬之小苟聞之亦潰

牛鞞今簡州陽安縣此中水所經由也
打鼻寰宇記彭山縣有鼻鼻山亦名打
鼻譙小苟所據也

譙縱棄成都朱齡石入成都縱自殺獲譙
道福于獠中斬之

蜀鑑卷第五

蜀鑑卷第六

氏羗楊氏據武都

池 晉惠帝元康六年略陽氏羗楊茂搜保仇

初略陽清水氏楊駒始居仇池仇池方
百頃其旁平地二十餘里四面斗絕而
高為羊腸蟠道三十六回而上至其孫
千萬附魏封為百頃王千萬孫飛龍寔
強盛徙居略陽飛龍以其甥令狐茂搜
為子茂搜避齊萬年之亂十二月自略

陽帥部落四千家還保仇池自號輔國將軍右賢王○仇池在今成州即武都地

愍帝建興二年楊難敵楊虎攻漢中刺史張光子孟長死之梁州人張咸起兵逐難敵

元帝建武二年氏王楊茂搜率長子難敵立

茂搜長子難敵與少子堅頭分領部曲

難敵號左賢王屯下辨堅頭號右賢王

屯河池○下辨今成州河池今鳳州

永昌元年趙王劉曜擊楊難敵難敵逆戰不勝退保仇池難敵稱藩于趙

明帝大寧元年楊難敵與弟堅頭奔漢中趙追擊之以田崧鎮仇池難敵請降於蜀

難敵還武都

秦州刺史陳安據隴右趙主曜擊殺之

難敵懼奔漢中曜以田崧鎮仇池難敵既送降遂還武都據險不服雄遣李稚

出白水李壽出陰平以擊難敵難敵遣

兵拒之壽不得進李稚及李珍長驅至
下辨難敵遣兵斷其歸路四面攻之稚
哈深入無繼皆為難敵所殺

大寧三年楊難敵襲仇池克之殺田崧
成帝咸和三年趙劉即襲楊難敵于仇池
弗克

即掠三千戶而歸

咸和六年蜀李壽攻陰平武都楊難敵降
之

咸和九年仇池王楊難敵卒子毅立

毅自稱左賢王下辨公以叔父堅頭之
子盤為右賢王河池公遣使來稱藩

咸康四年仇池氏楊初襲殺毅自立為仇
池公

初毅族弟稱臣於趙

穆帝永和九年秦攻楊初於仇池為初所
敗

永和十一年楊毅弟宋奴刺殺楊初初子
楊國殺宋奴自立為仇池公元溫表國為
鎮北將軍秦州刺史

永和十二年仇池公楊國從父俊殺國自立國子安奔秦

升平四年仇池公楊俊卒子世立

海西公太和三年楊世稱藩于晉以世為

秦州刺史

以世弟統為武都太守世又稱臣於秦

太和五年楊世卒子纂立

世始與秦絕叔父武都太守統與之爭

國起兵相攻

簡文帝咸安元年秦西縣侯稚楊安姚萇

等伐仇池楊統帥武都之衆降纂亦降秦

以統為南秦州刺史

秦西縣侯稚楊安姚萇等伐仇池楊纂

帥五萬之衆拒之晉梁州刺史楊亮遣

兵助纂與秦兵戰于峽中纂兵大敗纂

收散兵遁還西縣侯稚進攻仇池楊統

帥武都之衆降秦纂懼面縛出降稚送

纂于長安以統為南秦州刺史以楊安

鎮仇池

孝武帝寧康元年晉梁州刺史楊亮遣其

子廣襲仇池不克

廣與楊安戰兵敗沮水諸戍皆委城奔
潰亮退守磬陰九月安進攻漢川

秦王堅伐蜀陷之以楊安鎮成都王統鎮

仇池

太元十年楊定自稱仇池公

秦以楊定為雍州牧楊定徙治歷城置
儲蓄於百頃自稱龍驤將軍仇池公遣
使來稱藩因其所號假之其後又取天
水略陽之地

太元十九年楊定攻西秦兵敗死定弟盛

稱仇池公遣使稱藩

秦主苻崇為西秦王乾歸所逐奔隴西

王楊定乾歸遣將殺定及崇定無子其
叔父佛徇之子盛守仇池自稱征西將
軍秦州刺史仇池

太元二十一年封楊盛為仇池公

晉安帝義熙元年仇池王楊盛據漢中

譙縱反蜀大亂漢中空虛氏王楊盛遣
其兄子平南將軍撫據之

秦伐仇池攻漢中拔成固楊盛請降于秦
秦徙流民三千餘家於關中

義熙三年楊盛遣符宣入漢中刺史王敏
攻之盛軍盡口敏退屯武興

盛復通於晉以大將軍授之口盡口在
陽平關武興今沔州

義熙十年後秦伐仇池不克

楊盛侵擾祁山秦王興遣趙琨等攻之
姚恢出驚峽姚嵩上羊頭峽胡翼度出
沔城興自雍赴之天水太守王松忽言

曰先帝神略無方再入仇池無功而還
非楊氏智勇能全也直地勢險固耳使
君具悉形便何不表聞嵩不從琨衆寡
不敵為盛所敗

義熙十二年楊盛攻秦祁山拔之

宋武帝永初二年封楊盛為仇池王

宋文帝元嘉二年楊盛卒子玄立

盛聞晉亡不改義熙年號謂世子玄曰
吾老矣終當為晉臣汝善事宋帝及玄
立使來告喪始用元嘉年號

元嘉三年秦寵諮據武興楊難當將兵拒
諮不克

難當玄弟

元嘉四年楊玄圍秦梁州刺史出連輔政
于赤水

民執輔政以降輔政至駱口逃還○駱
谷見上注水經云駱谷水南迤仇池郡

魏封楊玄為南秦王

魏遣公孫軌奉策拜玄不出境軌責
讓之玄懼而郊迎

元嘉六年楊玄卒弟難當廢其子保宗而
自立

元嘉九年難當以保宗鎮宕昌以其子順
守上邽保宗謀襲難當難當囚之

宕昌西羗國名今西和州界後五年釋
保宗之囚使鎖董亭

楊難當遣司馬飛龍寇蜀遂陰平太守益
州刺史劉道濟擊斬之

益州刺史劉道濟聚歛刻霄流民許稅
之變姓名稱司馬飛龍自云晉室親往

依難當難當因民之怨資飛龍以兵使
侵擾益州道濟擊斬之蜀人趙廣等困
是為亂殺道濟以司馬飛龍為名後參
軍裴方明討平之踰年而後定

元嘉十年楊難當襲漢川據之

梁秦刺史甄法護刑政不治失氏羗之
和宋帝乃自徒中起蕭思話代之楊難
當因思話未至瀆護將下舉兵襲白馬
又攻葭萌法護弃城奔洋川之西城遂
有漢川之地○水經污水注洋州者漢

戚夫人所生之地帝蠲復其鄉更名曰
縣目曰洋川以表其祥

元嘉十一年蕭思話討楊難當破之復取
漢中

蕭思話至襄陽遣蕭承之為前驅緣道
收兵進據礪頭難當焚掠漢中引衆西
還留趙溫守梁州薛健據黃金山思話
遣陰平太守蕭坦攻鐵城戍拔之臨川
王義慶遣裴方明助承之拔黃金戍溫
弃州城思話擊破之健甲子退保下桃

難當遣其子和將兵與蒲甲子等共擊
蕭承之相拒四十餘日蕭承之以稍擊
之氏不能當走據大桃追斬獲甚衆悉
收漢中故地置戍於葭萌水甄法護賜
死蕭思話徙鎮南鄭初盛據漢中刺史
范元之等皆治魏興惟得魏興上庸新
城三郡及索邈為刺史乃治南城至是
南城為氏所焚故思話徙焉○寰宇記
云黃金城張魯所築水經漢水東逕小
大黃金南注云山有黃金峭水北對黃

金谷有黃金戍傍山依峭險於十里氏
掠漢中阻此為戍與鐵城相對一城在
山上一城在下皆容百許人以其峻險
故以金鐵制名下桃城南城北城在成
固皆今洋州真符縣地或言韓信所立
或言張良創築葭萌水華陽國志曰漢
水有二原西原出隴西岿冢山會泉逕
葭萌入漢

元嘉十三年楊難當自稱大秦王
改元建義然猶貢奉宋魏不絕其後復

稱武都王

魏伐楊難當于上邽降之

楊難當據上邽魏遣師討之先遣崔曠齎詔書諭難當難當懼請奉詔攝上邽守兵還仇池難當以其子順為雍州刺史守下辨

元嘉十六年楊難當寇魏上邽

魏王以詔書責讓難當難當引還仇池

元嘉十八年楊難當寇漢川詔裴方明討之

難當傾國入寇謀據蜀土遣符冲出東洛以禦梁州兵劉真道擊冲斬之難當攻葭萌獲晉壽太守申坦遂圍洛城劉道錫嬰城固守難當攻之十餘日不克乃還詔裴方明討之

元嘉十九年裴方明克楊難當難當奔魏楊保熾守仇池

裴方明等至漢中與劉真道分兵攻武興下辨白水皆取之楊難當遣符弘祖守蘭臯使其子和將重兵為後繼方明

與弘祖戰于濁水大破之追和至赤亭
又破之難當奔上邽獲其兄子保熾又
獲子虎送建康斬之仇池平以胡崇之
為北秦州刺史鎮其地立保熾為楊玄
後守仇池魏人迎難當諸平城真道方
明竟坐匿金寶善馬下獄死○濁水水
經注白水之異名也

元嘉三十年魏擊仇池取之

楊保熾走

魏殺武都王楊保宗宋立楊文德為武都

王屯葭蘆城

楊保宗謀叛魏魏河間公對鎮維谷誘
保宗送平城殺之鎮東司馬符達遂據
兵立楊文德為主據白崖分兵取諸戍
進圍仇池自號仇池公魏遣古弼擊楊
文德文德退走皮豹子督關中諸軍至
下辨聞仇池解圍欲還弼遣人謂豹子
曰宋人耻敗必將復來軍還之後再舉
為難不如練兵蓄力以待之不出秋冬
宋師必至豹子從之魏以豹子為仇池

與弘祖戰于濁水大破之追和至赤亭
又破之難當奔上邽獲其兄子保熾又
獲子虎送建康斬之仇池平以胡崇之
為北秦州刺史鎮其地立保熾為楊玄
後守仇池魏人迎難當諸平城真道方
明竟坐匿金寶善馬下獄死○濁水水
經注白水之異名也

元嘉三十年魏擊仇池取之

楊保熾走

魏殺武都王楊保宗宋立楊文德為武都

王屯葭蘆城

楊保宗謀叛魏魏河間公對鎮維谷誘
保宗送平城殺之鎮東司馬符達遂據
兵立楊文德為主據白崖分兵取諸戍
進圍仇池自號仇池公魏遣古弼擊楊
文德文德退走皮豹子督關中諸軍至
下辨聞仇池解圍欲還弼遣人謂豹子
曰宋人耻敗必將復來軍還之後再舉
為難不如練兵蓄力以待之不出秋冬
宋師必至豹子從之魏以豹子為仇池

鎮將楊文德遣使來求援秋七月詔以文德屯葭蘆城武都陰平氏多歸之葭蘆水經注羗水又逕葭蘆城南襄宇記在文州曲水縣城五十里

宋姜道盛楊文德合衆攻魏濁水成不克魏皮豹子等救之道盛戰死

元嘉二十四年魏人擊楊文德敗走漢中楊文德據葭蘆城招誘氏羗武都等五郡氏皆應之魏仇池鎮將皮豹子帥諸軍擊之文德奔漢中宋人削其爵土

元嘉二十七年取陰平平武郡以楊頭成葭蘆

起楊文德為輔國將軍引兵自漢中西入搖動汧隴陰平平武悉平梁南秦刺史遣文德伐啖提氏不克執送荊州使文德從祖兄頭成葭蘆

元嘉三十年蕭道成等帥氏羗攻魏武都魏鎮將苟莫干將突騎救之道成等引還

南鄭

孝武帝孝建二年以楊元和為征虜將軍

楊頭為輔園將軍

元和保宗子也宋以其幼弱未正位號
部落無定主其族父頭先戍葭蘆母妻
子弟並為魏所執而為宋堅守無貳心
王元謨諸以頭為西秦州刺史安輯其
衆侯元和稍長使嗣故業若其不稱即
以授頭必能藩扞漢川使無虜患若葭
蘆不守漢川亦不可立矣不從

明帝泰始二年以楊僧嗣為武都王

初武都王楊元和奔國奔魏從弟僧嗣

復自立屯葭蘆蕭惠開復遣兵至梁州
楊僧嗣帥群氏斷其道間使以聞以僧
嗣為武都王惠開自益州舉兵多任刑
誅蜀人猜怨合兵圍成都上赦其罪圍
亦解

蒼梧王元徽元年楊僧嗣率於葭蘆弟文
度立降魏

魏以文度為武興鎮將

順帝昇明元年楊文弘襲魏仇池陷之魏
皮歡喜等討之文弘弃城走魏拔葭蘆斬

楊文度以其弟文弘為武都王

魏皮歡喜拔葭蘆斬文度魏以楊雒當族弟廣香為陰平公葭蘆戍主仍詔歡喜築駱谷城文弘舉表謝罪於魏遣子苟奴入侍

齊高帝建元元年魏葭蘆鎮主楊廣降於齊

建元二年齊以楊雒當之孫後起為武都王鎮武興

武帝永明四年氏王楊後起率種人集始立

集始文弘之子也後起弟後明為白水太守魏亦以集始為武都王

永明十年楊集始寇漢中至白馬梁州刺史陰智伯擊破之

集始走還武興請降于魏

明帝建武二年魏圍南鄭不克

魏仇池鎮將招拔英圍南鄭梁州刺史蕭懿誘仇池諸氏斷其運道英全軍還建武四年氏帥楊靈珍來降遣其弟襲武

興王集始殺其二弟集同集衆集始亦來
降魏遣李崇伐之克武興楊靈珍奔齊

李崇槎山分道出氏不意表裏襲之群
氏皆奔楊靈珍散歸崇進據赤土靈珍
遣從弟建屯龍門自帥精勇一萬屯鷲
峽龍門之北數十里中伐樹塞路鷲峽
之口積大木聚礮石臨崖下之以拒魏
兵崇命慕容拒從它路夜襲龍門破之
崇自攻鷲峽靈珍連戰敗走獲其妻子
遂克武興靈珍奔還漢中魏主聞之喜

曰使朕無西顧之憂者李崇也以靈珍
為仇池公武都王

齊東昏侯永元二年楊集始自齊降魏守
武興

集始將衆萬餘自漢中北出規復舊地
魏梁州刺史楊椿遺集始書開以利害
集始遂降魏魏人還其爵位使守武興
梁武帝天監二年楊集始卒子紹先立

紹先幼國事決於二叔父集起集義
天監四年漢中太守夏侯道遷殺楊靈珍

以漢中叛降于魏

夏侯道遷為南譙太守奔魏魏使道遷
徙王肅鎮壽陽以道遷守合肥肅卒道
遷奔戍來奔徙梁州刺史莊兵里鎮南
鄭以道遷領漢中太守黑卒詔以王珍
國為刺史未至道遷謀降于魏先是楊
靈珍來奔以為假武都王助戍漢中有
部曲六百餘人道遷悼之發兵擊靈珍
父子斬之遂送於魏魏以邢巒為征梁
益諸軍事魏擊諸城戍所向摧破晉壽
太守王景嗣據石亭巒遣將擊走之巴
西太守龐景民據郡不下郡民嚴玄思
附於魏攻景民斬之楊集起集義闡魏
克漢中而懼遂帥群氏叛魏斬漢中糧
道巒屢遣軍擊破之梁遣孔陵戍深沔
魯方達戍南安任僧報等戍石同以拒
魏邢巒遣王足將兵擊破之遂入劍閣
陵等退保梓潼梁州十四郡地東西七
百里東北千里皆入于魏石亭水經
注漢水西逕石亭戍深坑在今閬州北

南安李膺記去宋置南安在今劍州晉成縣南石同在利州西今名石同谿按南鄭非魏能取之乃夏侯道遷以之降魏也然魏得仇池則漢中亦漸孤矣天監五年魏執楊紹先滅之置東益州

紹先稱帝集起集義稱王圍魏閬城邢岫使傅堅眼破之克武興執楊紹先送洛陽楊集起楊集義亡走遂滅其國以為武興鎮又改為東益州。按武都郡即今階成鳳沔文五州之地自晉惠帝元康六年丙辰楊茂搜據之至梁天監五年丙戌為後魏所滅凡二百一十一年

論曰蜀長江之上流也褒斜漢中蜀之門戶也武都又漢中之藩籬也江左君臣視蜀如上梗弁髦然自以為長江全勢無俟乎蜀也蜀與漢中置之度外而區區氏羌遂得以據四州之險歷二百年而后亡然無武都則無漢中無漢中則無蜀蜀非梁有一傳為陳而江左

勢孤矣巴事之覆轍可不鑒乎雖然以武都四州之地而氏羗持以立國者二百年曾謂以吳蜀之全力而不能守乎蜀刺史始不專用武人

齊武永明二年始以始興王鑑為益州刺史

晉氏以來益州刺史皆以名將為之帝以始興王鑑為刺史先是劫帥韓武方聚黨千餘人斷流為暴郡縣不能禁鑑行至上明武方出降僚佐咸請殺之鑑

曰殺之失信且無以勸善乃宥之於是巴西巖夷為寇暴者皆望風降附鑑時年十四喜文學器服如素士蜀人悅之○晉宋齊梁益州刺史○晉周撫○周楚撫之子○周仲孫○羅友○司馬執之○鮑陋○宋張茂度○劉道濟激趙廣之變○甄灋崇○周籍之○蕭惠開多任刑誅晉原一郡反○齊始興王鑑年十四○劉俊為江淹奏贓貨巨萬在益州置金浴盆○梁劉季連反○魯

休烈。鄧元起。蕭淵猷。蕭淵藻。武陵王紀十七年。見於史者十九人。論曰。巽巖李氏曰。自晉永和而元溫始。平李氏說。梁承聖而蜀乃盡入于周。跨歷四代。咸撫而有。雖符堅之侵。隋之盜竊。聲教暫阻。而旋即討平。其職貢于江東者。年所居多。而蜀士未有光顯者。豈果無人。當兩漢之際。蜀之文章。節義。足以冠冕海內。柱石帝京。夫豈足用于兩漢。而無用于晉宋齊梁者。失在於不能招徠之也。愚按。蜀之士大夫。狼狽於杜彼之流。徒空虛於蠻獠之衝突。非復兩京之舊矣。為益州刺史者。類無豈弟之政。一始興王鑑。乳臭少年。粗好文學。而蜀人已歸之。邢巒所謂蜀之民望。文學風流。亦為不少。率居山谷。不獲仕進。則流風餘俗。豈盡泯哉。李文簡公之論。其亦深究當時之實矣。

魏邢巒謀伐蜀

梁夫監四年。魏統軍王足進攻涪城。

梁將魯方達王景嗣等三十九人皆敗
死蜀人震恐益州城戍降魏者什二三
民自上名籍者五萬餘戶

魏梁州刺史邢巒上表請伐蜀不報魏王
足奔于梁巴西復降于梁

巒上表曰建康成都相去萬里陸行既
絕惟資水路水軍西上非周年不達益
州外無軍援一可圖也頃紘劉季連反
鄧元起攻圍資儲空竭吏民無復固守
之志二可圖也蕭藻屢少年未洽

治務宿昔名將多見囚戮今之所任皆
左右少年三可圖也蜀之所恃唯在劍
閣今既克南安已奪其險據彼境內三
分已一自南安向涪方軌無礙前軍累
敗後衆喪魄四可圖也淵藻是蕭衍骨
肉至親必無死理若克涪城淵藻安肯
城中坐而受困必將望風逃去若其出
鬪庸蜀士卒驚怯弓矢寡弱五可圖也
臣內者文吏不習軍旅賴將士竭力勤
有薄捷既克重阻民心懷服瞻望涪益

旦夕可屠正以兵少糧匱未宜前出今
若不取後圖便難况益州啟實戶口十
萬比壽春義陽其利三陪朝廷若欲進
取時不可失若欲保境寧民則臣居此
無事乞歸侍養魏王詔以平蜀之舉當
更聽後敕寇雒末夷何得以養親為辭
蠻又表稱昔鄧艾鍾會帥十八萬衆傾
中國資儲僅能平蜀所以然者關實力
也况臣才非古人何宜以二萬之衆而
希平蜀所以敢者正以據得要險士民
慕義此往則易彼來則難任力而行理
有可克今王足已逼涪城脫得涪則益
州乃成擒之物但得之有早晚耳且梓
潼已附民戶數萬朝廷豈可不守又劍
閣天險得而棄之良可惜矣臣誠知戰
伐危事未易可為自軍度劍閣以來鬢
髮中白日夜戰懼何可為心所以勉強
者既得此地而自退不守恐負陛下之
爵祿故也且臣之意美正欲先取涪城
以漸而進若得涪城則中分益州之地

斷水陸之衝彼外無援軍孤城自守何能復持久哉臣今欲使軍軍相次聲勢連接先為萬全之計然後圖功得之則大利不得則自全又巴西西南鄭相距千四百里去州迢遠常多擾動昔在南之日以其統綰勢難曾立巴州鎮靜夷獠梁州籍利因而表罷彼土民望嚴蒲何楊非唯一族雖率居山谷而豪右甚多文學風流亦為不少但以去州既遠不獲仕進至於州網無由厠迹是以鬱快

多生異圖比道遷建義之始嚴玄思自號巴州刺史克城以來仍使行事巴西廣袤千里戶餘四萬若於彼立州鎮攝華僚則大帖民情從墊江已還不勞征伐自為國有魏主不從先是魏主以王足行益州刺史梁遣張齊將兵救益州未至魏主更以羊祉為益州刺史王足聞之不悅輒引兵還遂不能定蜀久之足自魏奔梁邢巒在梁州接豪右以禮撫小民以惠州人悅之巒之克巴西也

使軍主李仲遷守之仲遷溺於酒色費散兵儲公事諮承無能見者巖忿之切
薩仲遷懼謀叛城人斬其首以城來降
○南安今劔州晉成縣涪今綿州巴西
縣晉穆帝永和中於梓潼郡僑置巴西
宋元嘉十五年割屬益州為巴西梓潼
二郡治故涪今名巴西縣

梁魏爭漢中

梁天監十三年魏遣高肇督步騎侵益州
梁遣任太洪禦之不克

肇將步騎十五萬命傅豎眼出巴北羊
祉出涪城奚康生出綿竹甄深出劔閣
游肇諫以為今頻年水旱百姓不冝勞
役往昔開拓皆因城主歸欵故有征無
戰蜀地險隘鎮戍無隙豈得虛動大軍
舉不謹始悔將何及不從軍至晉壽蜀
人震恐傅豎眼將救兵三萬擊巴北梁
遣任太洪自陰平間道入其州招誘氏
羗絕魏運路會魏大軍北還太洪襲破
魏東洛除口二戍進圍關城豎眼遣姜

喜等擊太洪大破之太洪奔關城走還
天監十四年晉壽歸于梁

傳豎眼性清素民獠懷之元法僧代之
素無治幹加以貪殘王賈諸姓本州士
族法僧皆召為兵葭萌民任令宗因衆
心之怨魏也殺晉壽太守以城來降民
僚多應之益州刺史鄱陽王恢遣巴西
梓潼二郡太守張齊將兵三萬迎之
天監十五年梁張齊圍武興魏擊敗之復
取東益州

元法僧遣其子景隆將兵拒張齊齊與
戰於葭萌大破之屠十餘城遂圍武興
法僧嬰城自守境內皆叛遣使告急于
魏魏以傳豎眼赴之豎眼入境轉戰三
日行二百里九遇皆捷張齊退白水梓
潼太守苟金龍領關城戍主梁兵至其
妻劉氏拒戰百有餘日梁兵遂退張齊
復去白水侵葭萌傳豎眼擊敗之齊走
還諸戍皆奔城走東益州復入于魏
普通六年梁蕭淵猷圍魏和安於小劍魏

淳于誕擊敗之

淵猷圍和安於小劍遣其將樊文熾置柵於龍髮山上以防歸路魏淳于誕焚其柵乘而擊之文熾大敗僅以身免大同元年梁馮陽王範樊文熾圍晉壽魏東益州刺史傅敬和來降晉壽歸于梁敬和豎眼之子也

梁蘭欽引兵攻南鄭梁州刺史元羅降南鄭歸于梁

自天監四年漢中入于魏凡三十年而

歸于梁

梁簡文帝大寶二年魏侵梁南鄭

侯景之逼江陵也湘東王繹求援於魏命梁秦二州刺史宜豐侯循以南鄭與魏循不可魏宇文泰遣達奚武取漢中循遣參軍劉璠求救於武陵王紀紀遣潼川刺史楊乾運救之

梁元帝承聖元年梁遣兵救南鄭魏人敗之

楊乾運至劍北達奚武逆擊破之劉璠

還至白馬西為武所獲送長安宇文泰
素聞其名待之如舊交時南鄭久不下
武請屠之泰將許之璠請之不許泣請
不已泰曰事人當如是當從其請

梁州刺史蕭循以州叛降于魏
達奚武遣人入南鄭說蕭循曰足下所
固者險所持者援所保者民今險不足
據援不可恃民不可保而宗國喪亂社
稷無主欲誰為忠乎循乃請降魏賀蘭
德碩請攻之赫連達曰不戰而獲城策

之上者豈可利其子女貪其貨財而不
愛民命乎且觀其士馬猶強城池尚固
攻之不克必彼此俱傷如困獸猶鬪則
成敗未可知也武曰公言是也乃受循
降獲男女二萬口而還於是劍北皆入
于魏○自大同二年漢中歸于梁歷二
十七年而復入于魏

西魏尉遲迥取蜀

梁承聖元年武陵王紀稱帝于成都
紀在蜀十七年南開寧州越雋西通資

陵吐谷渾內修耕桑鹽鐵之政外通商賈遠方之利侯景之叛湘東王繹起兵紀遂稱帝

承聖二年武陵王紀伐江陵魏尉遲迥伐成都以救之

紀帥諸軍東下留蕭撫守成都梁主繹甚懼與魏書曰子糾親也請君討之宇文泰曰取蜀制梁在茲一舉大將尉遲迥泰之甥也獨以為可迥曰蜀與中國隔絕百有餘年恃其險遠不虞我至若

以鐵騎兼行襲之無不克矣泰乃遣迥自散關伐蜀


魏師圍成都武陵王紀還次于西陵紀衆潰梁主殺之

成都降魏魏以尉遲迥為益州刺史

尉遲迥圍成都五旬蕭撫屢戰皆敗乃請降諸將欲不許迥曰降之則將士全遠人悅攻之則將士傷遠人懼遂受之魏以迥為益川刺史蜀自晉惠帝元康八年戊午李特亂蜀至梁承聖元年

壬申入于西魏凡二百四十五年
論曰蜀在江左歷晉宋齊梁若存若亡
者凡二百年而夏侯道遷以漢中入于
魏非魏能取之梁自亡之也歷三十年
據于魏而元羅又以漢中歸于南又歷
二十七年歸于梁而蕭循復以漢中入
于北亦非魏能取之梁自亡之也漢中
既亡而魏人以涪城為重鎮涪城綿川令武
陵王紀空國東下尉遲迥擣虛而來蕭
撝遂以成都降矣豈迫之威武足以加

蜀哉蜀一也諸葛孔明以一隅之地抗
衡中原而有餘江左諸人以吳蜀之全
保蜀而不足果在德不在險也



隆慶元年歲在丁卯仲春
上旬任于翠筠軒下